

HEBREU AG MỸ CARTA

Topě kósin

1 ¹Topě vỹ vāsỹ ěg jóg!jóg ve ag mré vēmén (ka)mē ja nĩgtĩ. Ag mỹ tóg tó mǎn!, tó mǎn!, he ja nĩgtĩ. Ti vỹ tó tĩ ag mỹ tóg tó ja nĩgtĩ, vāsỹ, ag tỹ vĕnh kar mỹ ti vỹ kǎmĕn jé. ²Ūri tóg kakó tĩ ha, kurǎ tỹ ěgno ti, kỹ tóg ūri ǎ kósin jĕnĕ, ti tỹ ěg mỹ Topě vỹ tó jé. Ti mré tóg nĕn ũ kar hyn han ja nĩgtĩ, Topě ti, ǎ kósin mré. Kỹ tóg ti mỹ nĕn ũ kar tag vin ke mũ gé. Ti hǎ mỹ tóg vin sór mũ, Topě ti, ǎ tú kar ěn ti. ³Ěg tỹ Topě kósin ve kỹ ěg tóg Topě tỹ tỹ ũn mág nĩ ki kanhró nỹtĩ. Ti ri ke pĕ ti nĩ, ti hǎ pĕ, tỹ ti Topĕn hǎ ve nĩ, ti kósin ti. Ti vỹ vỹ tar nĩ, tỹ tóg ěg tỹ nĕn kar vég mũ tag ki rĩr tĩ, ǎ vỹ tỹ. Ti hǎ vỹ ěg tỹ Topě vỹ mranh ěn tỹ tũg! he tĩ, kỹ tóg ěg jǎnhkrig kỹ ěg fĕg ke mũ. Ěg jagfy ter kar kỹ tóg Topě pĕgja tá nĩ nĩ, ũn tỹ vĕnh kar tar kǎfór nĩ ěn pĕgja tá, ti kósin ti.

Topě kósin tỹ Topě tỹ jĕgnĕ jafǎ ag kǎfór nĩ

⁴Topě kósin vỹ Topě tỹ jĕgnĕ jafǎ ag kǎfór nĩ, kanhkǎ tǎn ag. Ti jiji vỹ ag jygjy kǎfór nĩ gé. Hǎ kỹ ěg tóg vég tĩ, ti tỹ ag kǎfór nĩ ti. ⁵Topě pi(jé) ǎ tỹ jĕnĕ jafǎ ag kǎ ũ mỹ: “inh kósin vỹ tỹ ǎ nĩ,” he ja nĩgtĩ!. “Ūri hǎ sóg ǎ mỹ: tỹ inh ǎ panh nĩ, he mũ,” he ja tú ti nĩ, Topě ti, ǎ tỹ jĕgnĕ jafǎ ag kǎ ũ mỹ. Kỹ tóg ag kǎ ũ to: “ti panh vỹ tỹ inh nĩnh mũ, kỹ tóg tỹ inh kósin nĩnh mũ,” he ja tú nĩ gé. ǎ kósin hǎ to tóg tag tó ja nĩ, Topě ti.

⁶ǎ kósin ve ěn jĕnĕ ja ti nĩ, ěg to, Topě ti. ǎ tỹ ti jĕnĕn kỹ tóg tag tó gé, ha mĕ: “isỹ jĕgnĕ jafǎ ag vỹ ti krĕm mũg ke kǎn mũ, ha vemnĩ,” he ja ti nĩ, Topě ti.

⁷Hǎ ra ti tỹ jĕgnĕ jafǎ ag to vĕnh jykre tag tóg rán kỹ nĩ, ha mĕ: “Topě vỹ ǎ tỹ jĕgnĕ jafǎ ag tỹ kǎka ri ke han, kỹ tóg ag tỹ pĩ gru ri ke han mũ gé, Topě ti,” he tóg mũ gé, Topě vỹ rán ki, kanhkǎ tǎn ag to.

⁸Kỹ tóg ǎ kósin mỹ tag tó, ha mĕ: “Topě vỹ tỹ ǎ nĩ. ǎ tỹ tỹ pǎ'i mág nĩ vỹ tũg! henh ke tú pĕ nĩ. Vĕnh jykre kuryj han ǎ tĩ, ǎ krĕm ke kar ag mỹ. ⁹Vĕnh jykre kuryj to ǎ há nĩ. Vĕnh jykre pǎno to ǎ jũ nĩ. Hǎ kỹ sóg ǎ kuprĕg, isỹ tỹ Topě nĩn kỹ, isỹ tỹ ǎ pǎ'i nĩn kỹ. ǎ tỹ sóg ũn mág han, ǎ krĕm ke kar ag kǎfór ǎ tóg nĩ. ǎ tỹ tỹ pǎ'i mág nĩ tugrĩn ǎ fe tóg mrin kenh ke mũ, vĕnh kar fe tỹ mrin ke kǎfór,” he ja tóg nĩ gé, Topě ti, ǎ kósin ti mỹ.

¹⁰Kỹ tóg ti mỹ tag tó gé, ha mẽ: “ĕg tỹ nén (ũ) kar han ve ki ã tóg ga han, kanhkã ti ke gé, ã nĩgĕ tỹ. ¹¹Tũg' he kãn jé tóg ke mũ, ã tỹ nén han ja tag ti, jãvo ã hã tóg tũg' henh ke tũ pĕ nĩ. ã tỹ nén han ja tóg ã sinsin kỹ kugnãnh ke mũ, kur ri ke. ¹²Ti kãnhpĕn jé ã tóg (ke) mũ, ĕg tỹ kur kónhpĕn ri ke. Ĕg kur kunũg ĕg tĩ, ĕg tỹ ù kãra rãg jé. Tag ri ke han jé ã tóg ke mũ, ã tỹ han ja kar tag ti tỹ, ã tỹn kókĕn kỹ. Hã ra ã hã tóg tũg' henh ke tũ nĩ. Sin ke tũ pĕ ã tóg nĩ jãvo, kófãn ke tũ pĕ a tóg nĩ jãvo,” he ja tóg nĩ, Topĕ ti, ã kósin ti mỹ.

¹³Hã ra Topĕ pi(jé) ã tỹ jĕgnĕ jafã ag mỹ: “inh pĕgja tá nĩ,” he ja nĩ!. “Nĩ ra ver, inh pĕgja tá, sỹ ã kato ví mũ ag tỹ ã krĕm vin jé, kỹ ag se vĕ sir,” he ja tũ ti nĩ, ti tỹ jĕgnĕ jafã ag mỹ. ã kósin hã mỹ tóg tag tó. ¹⁴Topĕ tỹ jĕgnĕ jafã ag vỹ vĕnh kuprĩg ri ke nỹti, hã ra ag tóg Topĕ rãnhřãj ti han ti. Topĕ vỹ ag jĕgnĕg tĩ, ag tỹ ti tũ ag jy nĩgãn jé, ùn krenkren ke mũ ĕn ag jy.

Ĕg tỹ Topĕ ví to é henh ke tũ

2 ¹Hã kỹ tóg há tĩ, ĕg tỹ ti ví mẽ kỹ ti jykre hã han kỹ, ĕg tỹ tỹ prãnh ke tũ ni jé. ²Topĕ tỹ jĕgnĕ jafã ag vỹ vãsỹ Topĕ ví ma kãmũ ja nĩgtĩ. Hã ra ag tóg ki hã tó ja nĩgtĩ. Ũ tỹ ag ví ki krov tũ ĕn vóg kónãn ja ti nĩgtĩ, Topĕ ti. “Ũ tỹ ag ví mẽ sór tũ ĕn ag vóg kónãn jé sóg ke mũ,” he ja ti nĩ, hã kỹ tóg hã ra ke ja nĩgtĩ. ³Kỹ ĕg tóg ũri kren ke tũ ni gé, ĕg tỹ ti to é hen kỹ, ti tỹ ĕg kren han sór mũ ra. Nén ù mág pĕ vĕ mỹr, Topĕ tỹ ĕg krenkren han sór mũ tag ti. Ĕg pã'i vỹ ã mré mũ tĩ ag mỹ tó vén, ti tỹ ĕg kren han sór mũ tag ti. Ũ tỹ ti ví mĕg mũ ag vỹ ĕg mỹ tó ja nĩgtĩ gé, ti tỹ ĕg kren han sór tag ti, hã kỹ ĕg tóg ki kanhró nỹti ha. ⁴Kỹ Topĕ vỹ ù tỹ ĕg mỹ ti ví tó mũ ĕn ag ví to: “há ti nĩ,” he ja ni gé, hã kỹ tóg ag tar han, ag tỹ ĕg tỹ nén ù han vãnh ĕn hyn han jé, milagre ti, ĕg tỹ vĕsóg ki nén han ki kagtĩg ĕn. Tag to ag tar nỹti, Topĕ tỹ ag tãn kỹ, ù tỹ ti ví tó ti ag. Kỹ tóg ag mỹ ã kuprĩg jĕnĕ gé. Ti hã ne to jykren kỹ: “tag tar han jé sóg ke mũ, ĕn to, kỹ sóg ù ĕn tar han ke mũ, ù ù to,” he ja nĩ, ti ví tó tĩ ag to, Topĕ ti.

Topĕ kósin tỹ ĕg tỹ ùn mág han ke

⁵Topĕ vỹ nén (ũ) kar ĕn han mãn ke mũ, kỹ tóg tỹ ù tãg nỹtĩnh mũ. Ĕn kri pã'i vỹ tỹ ĕg nỹtĩnh mũ, ĕg tỹ tỹ ĕprã ke nỹti ra. Ti tỹ jĕgnĕ jafã ag pi(jé) tỹ ga tãg kri pã'i nỹtĩnh mũ!. ⁶Hã kỹ ti ví tó tĩ ù vỹ tag rãn ja nĩ, ti ví rãn ki, ha mẽ. Topĕ mỹ tóg: “tỹ ĕg tóg nén ù tũ nỹti vĕ, ĕg tỹ tỹ ĕprã ke nỹtĩn kỹ, hã ra ã tóg ĕg hã mĩ ĕkren kỹ nĩ nĩ,” he ja nĩ. “Tỹ ĕg tóg nén ù tũ nỹti vĕ, ĕg tỹ tỹ ĕprã ke krĕ nỹtĩn kỹ, hã ra ã tóg ĕg ki rĩr tĩ. ⁷Kỹ ã tóg prỹg pipir ki ã tóg ĕg tỹ ùn kãsir han ja nĩ, kỹ ĕg tóg ĕn kã ã tỹ jĕgnĕ jafã ag krĕm nỹti. Tag pãte ã tóg ĕg tỹ ùn mág han ke mũ, ùn tar, pã'i mág tỹ ùn há nĩ ĕn ri ke, ĕg tỹ vĕnh kar kri nỹti jé. ⁸Kỹ ã tóg ĕg krĕm nén (ũ) kar vin kãn ke mũ,” he ja tóg nĩ, Topĕ mỹ, Topĕ ví tó tĩ ti.

Ha vé, Topĕ vỹ ĕg krĕm nén (ũ) kar vin ja nĩ, ĕg tỹ tỹ nén (ũ) kar pã'i nỹti jé. Kỹ nén (ũ) kar vỹ ĕg krĕm nỹti. Ĕg krĕm nỹti tũ vỹ tũ tĩ. Hã ra ĕg tóg ver vĕg tũ nĩgtĩ, nén (ũ) kar tỹ ĕg krĕm nỹti ti. Ver tóg nén ù ù tỹ ĕg tũ tũ nỹti ven nĩ. ⁹Hã ra ĕg tóg Jesus hã tỹ tỹ ùn mág nĩ ĕn vĕg tĩ, ũri, ti tỹ tỹ

ün há nĩ ên, pã'i mág ri ke. Prÿg pipir ki Jesus tóg Topê tÿ jëgnê jafã ên ag krêm ke ja nĩ, kanhkã tãn ên ag krêm, kÿ tóg êg kar jagfy ter ja nĩ, Topê tÿ êg jagãgtãn kÿ. Kÿ tóg ùri tÿ ün mág pẽ nĩ nĩ, ti tÿ êg jagfy ter ja ên tugrĩn.

¹⁰Topê vÿ tÿ nén (ũ) kar kri ke nĩ, kÿ nén (ũ) kar vÿ ti tugrĩn rĩnrĩr nÿtĩ. Hã kÿ tóg vênhmÿ tũ nĩ, Topê tÿ Jesus mÿ: “ã jagtar tugrĩn ã tóg tÿ ün há tãvĩ nĩnh mũ,” hen kÿ. Hã jé Jesus tóg jagtar nĩ ja nĩgtĩ, ti tÿ tÿ ün há tãvĩ nĩn jé. Kÿ tóg ün e krenkren han mũ sir. Êg jo tóg tĩg mũ sir, Topê krê kar ag jo, êg tÿ ti ri ke há nÿtĩ jé gé, êg tÿ Topê jamã sĩnvĩ ên tá junjun jé, ti mré.

¹¹Ha vé, Jesus vÿ êg tar han tĩ, êg tÿ Topê vĩ mranh mãn sór tũ nĩ jé. Kÿ ù tÿ êg tar han mũ vÿ êg mré jóg pir nĩ, Jesus ti. Hã kÿ tóg êg to: “inh jãvy ag, inh ve fag,” he mũ. Êg to tóg mÿ'äg tũ nĩ. ¹²Êg to tóg: “inh jãvy ag mÿ sóg ã jiji tónh ke mũ, jóg!,” he ja nĩ. “Ag rĩnve sóg ã tÿ tÿ ün há nĩ ên kãmén ke mũ, ã jé tó jé sóg ke mũ, ag to sóg mÿ'äg ke tũ nĩ,” he ja tóg nĩ, Jesus ti, êg to. ¹³Kÿ tóg: “Topê ki sóg rã kÿ jê,” he mũ gé. Kÿ tóg: “inh mré ke ag há vê, Topê tÿ inh mÿ ün vin mũ ag kar há vê, fag ke gé,” he ja ní gé.

¹⁴Jesus mré ke ên ag há vÿ tÿ êprã ke ag nÿtĩ, fag ke gé. Hã kÿ Jesus vÿ ag mré ke tÿ êprã ke nĩ ja ní gé, há kÿ tóg êg jagfy ter ja nĩ. Ti tÿ Japo tũg ke vê, ã ter tugrĩn. Japo vÿ êg tén sór to tar nĩ, há ra Jesus vÿ ti tÿ tũ' henh ke mũ. ¹⁵Kÿ tóg êg krenkren han ke mũ, êg tÿ êg ter ke kamëgmëg kÿ. Êg ter ke tugrĩn êg tóg nén (ũ) tÿ êg tén ke mũ kar kamëg tĩ, nén (ũ) tÿ êg vóg kónãn tĩ kar ke gé. Hã ra Jesus tóg êg krenkren han mũ, kÿ êg tóg nén ù kamëg mãn ke tũ nĩ ha. ¹⁶Ti pi(jé) Topê tÿ jëgnê jafã ag krenkren han mũ', kanhkã tãn ag'. Abraão krê ag há krenkren han tóg mũ, ag jóg mré há, há kÿ tóg rán kÿ nĩ. ¹⁷Hã jé tóg ã jãvy ag ri ke nĩ ja nĩgtĩ, Jesus ti. Tÿ tóg êg há pẽ ja nĩgtĩ. Êg tÿ nén (ũ) kar han mũ ve kãn ja ti nĩgtĩ, êg jagtar mré há. Hã kÿ tóg êg jagfy vênh fëg, kÿ tóg êg tÿ Topê vĩ mranh tÿ tũ' he ja nĩ. Topê tũ ki rĩr tĩ to pã'i mág tÿ vênh rãnrãj han mũ ên ri ke han ja ti nĩ, Jesus ti. Ti tÿ êg jagfy Topê tũ ki rĩr nĩn kÿ tóg êg jagãgtãn tĩ. Ki rĩr há han tóg tĩ gé, ti tÿ êg mré tÿ êprã ke ja nĩn kÿ. ¹⁸Êg mré tóg jagtar ja nĩgtĩ, Jesus ti. Japo vÿ ti tÿ Topê vĩ mranh han sór ja nĩgtĩ gé, êg ri ke, há ra tóg mranh ja tũ nĩ inhhã. Hã kÿ tóg ki kanhró nĩ, êg tÿ nén (ũ) vég mũ kar ki. Hã kÿ tóg tag kar to êg tar han ki kanhró nĩ inhhã.

Jesus tÿ tÿ Moisés kri ke nĩ

3 ¹Inh kanhkã!, Topê tũ vÿ tÿ ãjag nÿtĩ. Kÿ tóg ãjag kuprêg, ãjag tÿ kanhkã tá ve jé. Hã kÿ Jesus mĩ êkrén nĩ. Topê vÿ ti fëg. Kÿ tóg êg mÿ Topê tũ ki rĩr tĩ to pã'i mág ên ri ke nĩ, êg tÿ ti ki rã kÿ. Ti há kãmén êg tóg tũ gé. ²Û tÿ ti fëg mũ ên rãnrãj han tóg tũ, Moisés ri ke. Moisés vÿ Topê tũ kar ki rĩr há han ja nĩgtĩ gé, Topê povo kar ki, ti ïn krêm ke kar fag ki. ³Hã ra Jesus vÿ Moisés kãfór nĩ. Û tÿ ïn han tũ vÿ ù tÿ ïn ki rĩr tĩ ên kãfór nĩ. Ri ke ti nĩ, Jesus tÿ Moisés kãfór nĩ ti. Êprã ke vÿ tÿ ti nĩ, Moisés ti, kÿ Jesus vÿ ti kãfór nĩ. ⁴Gĩr kar vÿ panh nÿtĩ gé. Û tÿ vênh kar han mũ vÿ tÿ Topê ti nĩ. ⁵Moisés vÿ Topê tũ ag ki rĩr ja nĩgtĩ, kÿ tóg ki rĩr há han ja nĩgtĩ. Topê camarada vÿ tÿ ti nĩ ja nĩgtĩ, kÿ tóg Topê ïn

krēm ke fag ki rīr nī ja nīgtī. Hā ra tóg Cristo tỹ nén han ke ěn kāmén ja nī gé, Moisés ti. ⁶Cristo vỹ tỹ Topě kósin nī, kỹ tóg Topě tũ ag ki rīr há han tĩ, há ra ag tóg tỹ ti tũ nỹti, ti in krēm ke kar ěn ag, ā tỹ ũn ki rīr tĩ ag, fag ke gé. Ěg há vė, ti tũ vỹ tỹ ěg nỹti, ti in krēm ke vỹ tỹ ěg nỹti, ěg tỹ ti to tar nỹtin kỹ, ěg tỹ ti kāmén há han kỹ, ti tỹ ěg mỹ sér nīn kỹ, ěg tỹ tá nén venh ke ti.

Ěg tỹ vėnhkán ke

⁷Tag tó tóg mũ, Topě ti, ā kuprīg tỹ, ha mē: “Ājag tỹ ũri inh vī mē kỹ vėnh kutu han tũg nī,” he tóg. ⁸“Ājag jógjóg ve ag vỹ vėnh kutu han ja nīgtī, kỹ ag tóg inh kato vāsán ja nīgtī, ag tỹ ga kórég ki nỹtin kỹ,” he tóg, Topě ti. ⁹“En kā ag tóg iso vī pätigtén ja nīgtī gé. “Ěg tỹ ti vī mranh mũ ra tóg ěg vóg konān ke tũ nī,” he ja ag tóg nīgtī, ag tỹ isỹ nén han mũ ěn ve ja ra, isỹ prýg tỹ 40 (ke) ěn ki ag ki rīr há han mũ ra. ¹⁰Hā kỹ sóg ag to jũ ja nī. Ag to sóg: “kórég ag nỹti,” hé. “Vėnh jykre há to jykren tũ ag tóg nỹtĩgtī,” he sóg. “Inh japry ve sór ja tũ ag tóg nỹti, inh jamīn ti,” he sóg. ¹¹Kỹ sóg ag to jũ nīn kỹ (sóg) ag to vī jũ han kỹ tag tó, ha mē. “Sỹ ag vėnhkán han ke vė vė, há ra ag tóg iso vī jũ han ja nī, há kỹ ag tóg vėnhkán han ke tũ nī ha. Hā kỹ ag ri ke han tũg nī, ājag tỹ ũri inh vī mē kỹ, he sóg mũ,” he tóg, Topě ti.

¹²Inh kanhkā, tag to jykren, ājag tỹ Topě kato vāsán sór tũ nī jé, ājag tỹ ti vī mranh sór tũ nī jé gé, ājag tỹ Topě tovānh sór tũ nī jé. Ti há ne ěg rīnrīr han ki kanhró nī, Topě ti. Hā kỹ ti tovānh tũg nī. ¹³Jagnė jyvėn nī, kurā kar ki, ũri mỹr. Ājag tỹ jagnė jyvėn to tar nỹtin kỹ ājag tóg Topě to tar nỹtin kỹ ke mũ gé, ha vemnī, kỹ ājag kāmī ũ vỹ vėnh kutu han ke tũ nī. Ěg tỹ ti vī mranh kỹ ěg tóg kutu nỹti, ha mē, ti vī mranh tỹ ěg mỹ sīnvī nīn kỹ. ¹⁴Ha mē, Cristo tũ vỹ tỹ ěg nỹti, ěg tỹ ti tovānh sór tũ nỹtin kỹ. Ěg tỹ ti ki rā ve kā ěg tóg ti to tar nỹti ja nīgtī. Ěg tỹ ěn ri ke ti to tar nỹtin kỹ ěg tóg tỹ ti tũ nỹti. ¹⁵Hā kỹ tóg ěg mỹ: “ājag tỹ ũri inh vī mē kỹ vėnh kutu han tũg nī,” he mũ. Ājag jógjóg ve ag vỹ tóg vėnh kutu hyn han' he ja nīgtī, kỹ ag tóg inh kato vāsānsān, isỹ ag jykre ve sór ja nīn kỹ. Ag ri ke han sór tũg nī,” he tóg mũ ěg mỹ. ¹⁶Ū tỹ hė nỹ hyn ti vī mē kỹ ti kato vāsānsān ja nīgtī? Ū tỹ ga tỹ Egito tá kā pa ja ěn ag há ja vė, ha mē, Moisés tỹ tá ag tatīn kātīg kỹ. ¹⁷Kỹ Topě hyn ũ tỹ hė to jũ ja nīgtī, prýg tỹ 40 (ke) ěn ki? Ū tỹ ti vī mranh ja ěn ag há to tóg jũ ja nī, há kỹ ag tóg ga kórég ěn ki tũ! he kán. ¹⁸Kỹ Topě hyn ũ tỹ hė to: “vėnhkán ke tũ ag nỹti ha,” he ja nīgtī? Ū tỹ ti vī han sór tũ ěn ag to ke ja vė, mỹr, ha mē. ¹⁹Ag tỹ ti tovānh kỹ, há kỹ ag tóg ag tỹ nén ve sór ja ěn ve ja tũ nī sir, mỹr, ha mē.

4 ¹Topě vỹ ěg mỹ tag tó ja nīgtī gé. Ti tỹ ěg vėnhkán han sór vė, kỹ ti vī to é he tũg nī. Vėnh ki rīr há han nī, ājag tỹ to krónh ke tũ nīn jé. ²Mė ěg huri, Topě tỹ ěg mỹ nén han sór mũ ěn ti, ũ tỹ ga kórég mī mũ ěn ag tỹ mē ri ke han ěg tóg huri. Hā ra ag tóg véké mē ja nīgtī, kri fi ja tũ ag nỹtĩgtī, ag tỹ mēg mũ ra. Hā kỹ tóg ag mỹ nén ũ há han ja tũ nī, Topě vī ti. ³Ěg tỹ ti ki ge há kỹ ěg tóg vėnhkánkán ke mũ. Hā kỹ Topě vỹ tag tó, ha mē: “ag to jũ nīn kỹ sóg ag to vī jũ han kỹ tag tó, ha mē. “Sỹ ag vėnhkán han ke vė vė, há ra ag tóg vėnhkán ke tũ nỹti ha,” he ja ti nī. Topě vỹ vāsỹ vėnhkán ja nīgtī, ti tỹ nén (ũ) kar pė han han ti kỹ. Kỹ nén (ũ) kar

vỹ hyn han kÿ nÿtĩ ha. ⁴Hã kÿ kurã tÿ 7 (ke) ên to tag tóg rán kÿ nĩ, ha mẽ. Topê tÿ nén kar hyn han kãn ja to tag tóg rán kÿ nĩ, ha mẽ: “kurã tÿ 7 (ke) ki Topê vỹ vênhkán, ã rãnrãj han kãn kÿ,” he tóg mü, Topê vĩ rán ki. ⁵Hã ra tóg Israel ù ag to tag tó ja nĩ gé, hã vỹ: “kÿ ag tóg vênhkánkán ke tũ nÿtĩ ha,” he mü gé. ⁶Hã kÿ ù ag tóg vênhkánkán ke mü. Vãsÿ Topê tóg êg jógjóg ve ag mÿ ag vênhkánkán ke tag tó ja nĩgtĩ vê, hã ra ag tóg ti vỹ jêmê ja tũ nĩgtĩ, hã kÿ ag tóg vênhkánkán ke tũ nÿtĩ ha. Kÿ Topê tóg ù ag kuprêg ja nĩgtĩ, kÿ tóg ag hã mÿ ag vênhkánkán ke ti nĩm mü sir, êg hã mÿ. ⁷Kurã tãg nĩm ja ti nĩ gé, êg vênhkán ke to, hã vỹ: “ürĩ,” he mü. Hã kÿ Davi tóg kurã tãg tag to tag rán ja nĩ, ha mẽ. Ag tÿ ga kórég ên tá kãpa kar kÿ, ag tÿ ga há tá junjun kar kÿ Davi tóg tag rán ja nĩ gé, ha mẽ: “ãjag tÿ ürĩ ti vỹ mẽ kÿ vênh kutu han tũg nĩ,” he ja tóg nĩ. Kurã tãg to ken hã vê.

⁸Josué vỹ Israel ag mré ga há ên ra tĩg ja nĩgtĩ. Hã ra ag tóg tá vênhkán pê han ja tũ nĩgtĩ ver, hã kÿ Davi vỹ ag mÿ kurã ù tó ja nĩ, ag vênhkán pê han ke ên ti tó ja ti nĩgtĩ. ⁹Ha mẽ, Topê povo vỹ vênhkán ke mü, ha vemnĩ, ti tÿ ag mÿ kurã niv ki. ¹⁰Û tÿ vênhkán pê ên vég mü vỹ ã rãnrãj ki vênhkán ke mü, Topê tÿ ã rãnrãj ki vênhkán mü ên ri ke, kurã tÿ 7 (ke) ên ki. ¹¹Hã kÿ vãsãnsãn, ãjag tÿ tÿ prãnh ke tũ nĩ jé, ãjag tÿ ga kórég kri mü ja ên ag nón ti vỹ mranh tũ nĩ jé, ãjag tÿ ãjag vênhkán ke ên ve jé.

¹²Topê vỹ hã tugrĩn êg tóg rĩnrĩr nÿtĩ. Á vỹ hã tÿ tóg nén kar hyn han tĩ. Rógro jã régre vỹ nén (ũ) kym há nÿgtĩ. Hã ra Topê vỹ vỹ ti tÿ nén (ũ) kym há kãfór han tĩ, kÿ ti vỹ tóg êg kãra rã tĩ, êg nĩ ti kãra, êg kukã ti kãra ke gé, êg kri ti kãra ke gé, êg kuprĩg ti kãra tóg rã tĩ gé. Kÿ tóg êg tÿ nén (ũ) to jykrén mü kar ki kanhró nĩ, êg tÿ nén (ũ) han sór mü ki kanhró kar ti nĩ gé, Topê ti. ¹³Nén (ũ) kar ki kanhró tóg nĩ, Topê ti, ã tÿ nén han mü kar ki kanhró tóg nĩ. Nén ù tóg ti mÿ vênh péju kÿ nĩ tũ pê nĩ. Û tóg ti vatánh tá nén ù han ke tũ pê nĩ gé. Ki kanhró kar ti nĩ, ù tÿ êg jykre tugnÿm ke mü ên ti.

Jesus tÿ êg jagfy vĩnh ke

¹⁴Ti to tar nÿtĩmnĩ, ha mẽ. Ti ki rã kÿ ãjag nÿtĩ, kÿ ti to tar nÿtĩmnĩ. Êg jagfy Topê tũ ki rĩr tĩ to pã'ĩ mág vỹ nĩ nĩ, hã vỹ: Jesus, he mü, Topê kósin, he mü. Ên vỹ kanhkã tá jun huri. ¹⁵Ti pi(jé) êg krój nÿtĩ tag ki kagtĩg nĩ'. Ki kanhró tóg nĩ mÿr. Êg ri kén tóg jagtar nĩ ja nĩgtĩ gé, kÿ Japo vỹ ti tÿ Topê vỹ mranh han sór ja nĩgtĩ gé, hã ra tóg inhhã mranh ja tũ nĩgtĩ. ¹⁶Hã kÿ êg tóg Topê mré vémén ke mü, jatun mÿ. Múmêg vãn h nÿtĩ jé êg tóg ke mü. Êg jagãgtãn jé tóg ke mü, Topê ti, kÿ tóg êg tar han ke mü gé, êg krój nÿtĩn kÿ.

5 ¹Êprã ke tÿ Topê tũ ki rĩr tĩ to pã'ĩ mág jykre vỹ ge nÿgtĩ, ha mẽ. Á mré ke ag jagfy tóg vỹ tĩ, Topê mré, kÿ tóg ag jagfy Topê mÿ nén ù pũn tĩ gé, kÿ tóg ag mêg tãnh kÿ pũn tĩ gé, ag tÿ Topê vỹ mranh ja tugrĩn. ²Hã ra tóg tÿ êprã ke nĩ gé, ag mré, ag krój ri ke tóg nĩ gé, hã kÿ tóg ag krój nÿtĩ ra ag jagãgtãn há han tĩ, ù tÿ Topê vỹ mranh sór tũ ra mranh mü ên ag. ³Mranh tóg tĩ gé, Topê tũ ki rĩr tĩ to pã'ĩ mág ên ti, hã kÿ tóg ã tÿ mranh mü ên to Topê mÿ tãnh kÿ pũn tĩ gé, ã mré ke ag tũ ên mré. ⁴Hã ra tóg vêsó: “inh hÿn Topê tũ ki rĩr sór mü, kÿ

inh h̄yn t̄y tag to p̄a'i mág n̄inh m̄ũ,” henh ke tũ p̄ẽ nĩ. Topẽ hã ne ũ to: “isũ ki r̄ir tĩ to p̄a'i mág v̄y t̄y ã n̄inh m̄ũ,” he tĩ', ti t̄y v̄as̄y Arão kupr̄eg vén ên ri ke.

⁵Hã k̄y Cristo v̄y v̄esóg ki tag to jykrén ja tũ nĩ gé. Ti pi(jé) v̄es̄y p̄a'i han ja n̄igtĩ', v̄es̄y Topẽ tũ ki r̄ir tĩ ên to p̄a'i mág han sór ja tũ tóg n̄igtĩ'. Topẽ hã ne ti m̄y: “inh kósin v̄y t̄y ã nĩ,” he ja nĩ'. “Ūri sóg ã m̄y: t̄y inh ã panh nĩ, he m̄ũ,” he ja ti nĩ, Topẽ ti, Jesus m̄y. ⁶K̄y tóg ti m̄y tag tóg gé, k̄y tóg rán k̄y nĩ gé, Topẽ v̄i t̄y rán k̄y nĩ ki, ha m̄ẽ: “isũ ki r̄ir jé ã tóg ke m̄ũ. Tũ' henh ke tũ ti n̄inh m̄ũ, ã t̄y isũ ki r̄ir nĩ ti, Melquisedeque t̄y isũ ki r̄ir m̄ũ ên ri ke,” he ja ti nĩ gé, Cristo m̄y, Topẽ ti.

⁷Jesus v̄y, ã t̄y ga m̄i t̄ig k̄y jagtar n̄inh k̄y (tóg) Topẽ m̄y to v̄i', to v̄i' he ja n̄igtĩ, ti t̄y ti kren han jé, ti ter tũ nĩ jé. K̄y tóg f̄y gé, Topẽ mré v̄emén k̄y. V̄es̄yrénh jagy han tóg. K̄y Topẽ v̄y ti v̄i j̄emê ja nĩ, Jesus t̄y ti m̄y to v̄in k̄y. Topẽ m̄y tóg t̄y ũn há nĩ, Jesus ti, hã k̄y tóg ti v̄i j̄emê ja nĩ. ⁸Topẽ kósin v̄y t̄y ti nĩ, Jesus ti, hã ra tóg ã jagtar tugr̄in (tóg) Topẽ t̄y n̄én tó m̄ũ ki kanhr̄an k̄an ja nĩ, ti t̄y Topẽ v̄i hã han jé. ⁹Ti t̄y v̄enh kanhr̄an k̄an k̄y tóg êg kren p̄ẽ han ki kanhr̄o nĩ ge sir. Êg jagf̄y tóg ter ja nĩ, k̄y tóg êg kren han m̄ũ, êg t̄y ti v̄i ki króm k̄y. ¹⁰Topẽ v̄y ti m̄y: “inh m̄y isũ ag ki r̄irm̄ni, to p̄a'i mág v̄y t̄y ã nĩ, Melquisedeque ên ri ke,” he ja nĩ. Hã k̄y tóg t̄y pa'i nĩ, Jesus ti.

Êg t̄y ti to krónh kenh ke tũ

¹¹S̄y ãjag m̄y tag k̄amén k̄an sór m̄ũ ra tóg jagy tĩ. Tó jagy ti tĩ, tag ti. K̄y ãjag tóg m̄ẽ há han tũ n̄igtĩ gé. ãjag pi(jé) kr̄i há n̄ytĩ ver'. ¹²ãjag t̄y ù ag kanhr̄an ke v̄ẽ v̄ẽ, ãjag t̄y v̄as̄y Topẽ v̄i m̄ẽ ja n̄yt̄in k̄y. Hã ra ãjag tóg ver ki kaḡt̄ig n̄ytĩ. ãjag k̄ã ù t̄y ãjag m̄y Jesus k̄amén vén ên tó m̄an k̄y tóg há n̄ynh m̄ũ v̄ẽ. Ḡir k̄asir ri ke ãjag n̄ytĩ. Ḡir k̄asir ag v̄y leite hã kron tĩ, ãjag t̄y ver k̄asir n̄yt̄in k̄y. ¹³J̄avo ũn sanh ag hã v̄y v̄ej̄en kufy ko tĩ'. Ḡir t̄y leite kron m̄ũ ri ke ãjag n̄ytĩ, ãjag t̄y Jesus k̄ame ên ki kanhr̄an k̄an tũ n̄yt̄in k̄y ver. ¹⁴Ū t̄y to jykrén há han m̄ũ ên v̄y ũn sanh há ri ke nĩ, k̄y tóg ki kanhr̄o nĩ. “Tag v̄y há nĩ, tag v̄y há tũ nĩ, tag v̄y kuryj nĩ, j̄avo tag v̄y kygn̄ê k̄y nĩ,” he jé tóg ke m̄ũ, ũ t̄y ki kanhr̄an há han m̄ũ ên.

6 ¹ãjag t̄y ver ḡir k̄asir ri ke n̄ytĩ ra sóg ãjag m̄y Jesus k̄amén vén ja ên tó sór tũ nĩ ha. S̄y ãjag m̄y ũn sanh ag tũ k̄amén sór v̄ẽ ha, ãjag t̄y ver to tar n̄ytĩ tũ ra. Jesus k̄amén vén j̄ã ên hã v̄ẽ, ḡir t̄y ã pafa ja kron ên ri ken hã v̄ẽ, ha m̄ẽ: v̄enh jykre kórég tov̄anh jé êg tóg ke m̄ũ, êg t̄y n̄én to ter ke m̄ũ ên tov̄anh k̄an jé êg tóg ke m̄ũ. Topẽ ki r̄ã jé êg tóg ke m̄ũ. ²Ū t̄y ti ki r̄ã m̄ũ ên kype jé êg tóg ke m̄ũ, k̄y êg tóg ti kri êg n̄igé finh ke m̄ũ gé, ti t̄y êg mré Jesus ki r̄ã k̄y jé jé. Kar k̄y êg tóg êg ter kar k̄y r̄ir m̄an ên to jykrén ke m̄ũ gé, Topẽ t̄y êg jykre tugn̄ym ke ên to. V̄enh k̄ame tag kar v̄y ḡir t̄y ã pafa ja kron ên ri ke nĩ. ³Tag tó m̄an sór tũ inh nĩ ha, ãjag t̄y v̄as̄y m̄ẽ ja tag. S̄y ãjag m̄y tag p̄ate Jesus k̄amén sór v̄ẽ, k̄y tóg ũn sanh t̄y v̄ej̄en kufy ko ên ri ke nĩ. Topẽ t̄y tag to isar han k̄y sóg ãjag m̄y k̄amén há han ke m̄ũ.

⁴Ha m̄ẽ, êg k̄amĩ ù ag tóg ag t̄y Topẽ ki r̄ã kar k̄y (ag tóg) ti tov̄anh p̄ẽ han ja n̄igtĩ. K̄y ag tóg ti ki ge m̄an ke tũ n̄ytĩ ha. Êg t̄y Topẽ ki ge k̄y tóg êg kanhr̄an ke m̄ũ, v̄enh jykre há ki. Topẽ v̄y êg m̄y kanhk̄ã tá v̄enh jykre há ên n̄im m̄ũ. Êg m̄y tóg ã kupr̄ig j̄en̄eg m̄ũ gé. ⁵Topẽ v̄i há nĩ ên v̄eg êg tóg tĩ. Êg t̄y

kanhkã tá nén venh ke ên ve sî han êg tóg tí, êprã, êg tý Topê ki ge ký. ⁶Û tý ti jykre tag ve kar ký ti tovãnh pê han ký tóg vênhmỹ nî. Ký tóg ti ki rã mãn ke tũ nî ha, ã jykre kórég tovãnh mãn ke tũ ti nî ha, ù tý ti tovãnh pê han mũ ên ti. Ha vé, êg tý ti ki rã há han kar ký ti tovãnh ký êg tóg ti tý cruz to sa mãn ri ke han mãn mũ sir, Topê kósín ti. Êg tý vênh kar tý ti to é he han mãn vê sir.

⁷Êpỹ ri ke ti nî, ha mẽ. Ta tý ti kri kutê ký ga mrãn ký êg jakré tóg mog há han tí, êg tý ga há ki ti krãn ti ký. Êg tý êpỹ há ri ke nýtín ký, êg tý Topê mỹ vênh jykre há han ký tóg êg ve há han mũ, Topê ti. ⁸Êpỹ ù tóg hã ra kórég nî. Ký sónh hã tóg ki munmur tí, vãnh ti ke gé, ký tóg mogmog kónãn tí sir, êg jakré ti. Êg tý êpỹ kórég ên ri ke nýtín ký Topê vỹ êg tovãnh ke mũ sir, ký tóg êg mỹ ví kónãn han ke mũ, ký êg kejên pũr ke mũ, kurã ên kã.

⁹Ha mẽ, ví tar han inh huri. Hã ra ájag tóg ti jagy tag venh ke tũ pê nî, ki kanhró inh nî. Ájag to sóg há nî. Krenkren jé ájag tóg ke mũ, ki kanhró inh nî. ¹⁰Rãnrãj há han ájag tóg tí. Ti to ájag há távi nýtí. Ti tũ ki rír há han ájag tóg tí gé. Topê vỹ tag vég tí, ájag rãnrãj há tag. Ti pi(jé) kã jatu nigtí! Vênh jykre vênhmỹ han tũ pê ti nigtí, Topê ti. ¹¹Hã ra sóg ájag mỹ tag tó, ájag tý ti to tar távi nýtí jé, ájag tý ti to krónh ke tũ nî jé. Ký ájag tóg venh ke mũ, ájag tý nén (ũ) ve sór mũ ên ti. ¹²Ájag tý ti to krónh ken ký tóg kórég nî. Û tóg êg jo Topê ki rã ja nigtí, hã ra ag tóg ti tovãnh ja tũ pê nigtí, ký ag tóg hur vé, Topê tý êg mỹ nén ven sór mũ ên ti. Tag ag ri ke han nî, ù tý êg jo ti tovãnh jávãnh ên ag ri ke han nî.

Topê tý ã ví ên han kãn ke

¹³⁻¹⁴Topê vỹ Abraão mỹ: “ã to ví há han jé sóg ke mũ, ã krê e han jé sóg ke mũ,” he ja nî. Ký tóg ti mỹ: “ã pi(jé) tag venh ke tũ nî!, inh hã vỹ ki kanhró nî!,” he ja nî gé. Û tý ti kãfór nî ra tóg ên to: “ti hã vỹ ki kanhró nî,” henh ke vê vê. Hã ra ù tóg Topê kãfór nî tũ nî, hã ký tóg: “inh hã vỹ ki kanhró nî,” he ja nî, Topê ti. ¹⁵Kỹ Abraão vỹ Topê tý ti mỹ nén tó ja tag to tar nî ja nigtí gé. Jatun mỹ tóg ã kósín ke ên jávãnh ja nigtí, hã ký tóg kejên ti vé.

¹⁶Êprã ke ag vỹ, ag tý jagnê mỹ ví há han sór ký ag tóg jagnê mỹ: “inh kri nî ên vỹ ki kanhró nî, sỹ ã mỹ nén han ke ti,” he tí. Tag tó ký ag tóg jagnê jũ tý tũ! he tí. Û tý tag tó ký ag tóg ki kanhró nýtí, ti tý ki hã tó ja ti. Êprã ke ag jykre hã vê. ¹⁷Vênh jykre tag han ja ti nî, Topê ti, ti tý êg mỹ ã ví jênên ký. Ti tý êg mỹ nén tó ja ên ve jé êg tóg ke mũ. Êg tý tag ki kanhrãn há han hã jé tóg êg mỹ: “ki kanhró inh nî,” he ja nî. Tó ù han mãn ke tũ ti nî ha. Á tý tó ja ên hã han jé tóg ke mũ, ti tý: “ki kanhró inh nî,” hen ký. ¹⁸Ti ví régre to êg tóg ki kanhrãn há han tí. Êg mỹ tó kar ký tóg: “ki kanhró inh nî,” he ja nî gé. Ti ví régre hã vê. Hã ký êg tóg venh ke mũ, ti tý êg mỹ nén tó ja ti. Tó ù han mãn ke tũ ti nî ha, hã ra tóg ón ja tũ nî gé, ti tý ón ki kagtũg nĩn ký. Ti tý êg mỹ nén tó ja ên ve sór êg tóg mũ, hã vỹ: kanhkã, he mũ, hã ký tóg êg hã mỹ tó ja nî, Topê ti. ¹⁹Êg tý kanhkã ve sór ký êg tóg to krónh ke tũ nigtí. Êg tý kanhkã tá ùn ve sór mũ hã vỹ êg tar han tí, êg tý tý prãnh ke tũ nî jé. Tá jun jé êg tóg ke mũ, ha vemnĩ, Topê jamã tá. ²⁰Jesus vỹ tá jun vén, êg jo, ký tóg êg mỹ Topê to êpỹ ti han, Topê to êmĩn ti. Êg jagfy

tóg tỹ Topê tũ ki rĩr tĩ to pã'i mág nĩ, Melquisedeque ên ri ke. Kurã krỹg ja tũ ti nĩ, ti tỹ tỹ pã'i nĩ ti. Kỹ tóg êg jo Topê rĩnja tá nĩ nĩ, êg tỹ ti nón tá junjun jé gé.

Melquisedeque kãme

7 ¹Melquisedeque ên vỹ tỹ pã'i mág nĩ ja nĩgtĩ, cidade tỹ Salém kri, kỹ tóg Topê tũ ki rĩr nĩ ja nĩgtĩ gé, ù tỹ vênh kar kri ke nĩ ên tũ ki. Abraão vỹ pã'i tỹ 4 (ke) ên mré vênh génh han ja nĩ. Ti tỹ ag kãgtén kar kỹ Melquisedeque ên vỹ ti kato tẽ, kỹ tóg ti mỹ: “Topê vỹ ã ve há han, kỹ tóg ã ve há han mân ke mũ gé,” he mũ. ²Kỹ Abraão vỹ ti mỹ dízimo ên nĩm mũ sir, ã tũ tỹ 10 (ke) kar ki tóg ùn pir nĩm mũ sir, Melquisedeque mỹ, ti tỹ ùn kato tẽ mũ ên ag tũ mân ja tỹ dízimo ên ti. Ti jiji to ken hã vẽ, hã vỹ: vênh jykre kuryj to pã'i, he mũ, hã vỹ: Melquisedeque, he mũ. Kỹ tóg tỹ cidade tỹ Salém to pã'i nĩ, hã vỹ: ùn krĩ kuprã ên ag pã'i, he mũ. ³Panh tũ ti nĩ, mỹnh tũ ke gé, jóg'jóg ve tũ ti nĩ gé. Û ki mur já tũ ti nĩ, kỹ tóg ter ja tũ nĩ gé. Topê kósin ri ke ja ti nĩ. Topê tũ ki rĩr kỹ tóg nĩ nĩ, ti kurã vỹ krỹg ja tũ nĩ, Melquisedeque kurã ti.

⁴Pã'i mág pẽ vẽ, Melquisedeque ti, hã kỹ Abraão vỹ ti mỹ ã tũ tỹ dízimo nĩm ja nĩ gé. Hã ki êg tóg ki kanhró nỹtĩ, ti tỹ Abraão kãfór nĩ ti, Melquisedeque ti. ⁵Û tỹ Israel ag kãmĩ dízimo mág ti ag vỹ tỹ Levi krê nỹtĩ, ù tỹ Topê tũ ki rĩr tĩ ên ag. Ajag mré ke ki ag tóg dízimo ên mág tí, ag kar tỹ tỹ Abraão krê'krê nỹtĩ ra. ⁶Hã ra Melquisedeque pi(jé) tỹ Abraão mré ke nĩ ja nĩgtĩ'. Ge ra Abraão tóg ti mỹ dízimo ên nĩm ja nĩ, kỹ tóg ti mỹ: “Topê vỹ ã ve há han,” he mũ gé, Melquisedeque ti, Abraão mỹ, Topê tỹ Abraão mré vémén kar kỹ, Topê tỹ ti mỹ: “ã kófa ra ã kósin ke mũ,” he kar kỹ. ⁷Kỹ tóg Abraão kãfór nĩ, Melquisedeque ti, ti tỹ ti mỹ: “Topê vỹ ã ve há han,” hen kỹ. Ti kri ke vỹ tỹ ti jẽ.

⁸Levi krê'krê ên vỹ tỹ êprã ke nỹtĩ gé, ù tỹ ajag mré ke ki dízimo mág tí ên ag. Hã ra Melquisedeque vỹ ter ja tũ nĩ nẽji, hã kỹ tóg rán kỹ nĩ, Topê vĩ tỹ rán kỹ nĩ ki. Ûn ter tũ vỹ Abraão ki dízimo mân ja nĩ, hã vỹ: Melquisedeque, he mũ. ⁹Kỹ, Abraão tỹ ti mỹ dízimo nĩm ên kã tóg ã krê'krê kósin tỹ Levi jagfy ti mỹ dízimo nĩm ja nĩ gé, Melquisedeque mỹ. Hã kỹ Levi krê'krê ag vỹ ajag mré ke ag ki dízimo ve ja nĩgtĩ gé sir. ¹⁰Abraão tỹ Melquisedeque mỹ dízimo nĩm ên kã Levi vỹ mur ja tũ nĩ ver, hã kỹ ti jóg'jóg ve tỹ Abraão vỹ ti jagfy dízimo nĩm ja nĩ. Nĩm kar kỹ tóg kejên Levi vovo han mũ sir, Abraão ti, Melquisedeque tỹ ti mré vémén kar kỹ.

¹¹Topê tỹ Levi krê'krê ag mỹ: “isũ ki rĩrmnĩ,” he ên kã tóg ag mỹ tag to vênh jykre nĩm ja nĩgtĩ gé, ag tỹ ki rĩr ke to. Ag hã tỹ ki rĩr há han ke vẽ vẽ, hã ra ag tóg ki rĩr kãn já tũ nĩ, hã kỹ Topê tóg ù tỹ ki rĩr ke mũ ù jênẽ ja nĩ, ù tỹ Melquisedeque ri ke ên, hã vỹ: Jesus Cristo, he mũ. Ag tỹ ki rĩr há han ja nĩ ra Topê hỹn ti jênênh ke tũ nĩ vẽ, kỹ Arão krê'krê ên ag hã vỹ ki rĩr nỹtĩnh ke vẽ vẽ. ¹²Kỹ, Jesus tỹ Topê tũ ki rĩr kỹ Topê vỹ ti mỹ tag to vênh jykre tãg han ja nĩ gé. ¹³⁻¹⁴Hã kỹ tóg ki rĩr nĩ sir. Ti pi(jé) tỹ Levi krê'krê ag kã ù nĩ', êg Senhor tỹ Jesus ti. Judá krê'krê ag kã ù vỹ tỹ ti nĩ. Ge ra tóg Topê tũ ki rĩr mũ. Judá krê'krê ù tóg Topê tũ ki rĩr ke tũ tĩ vẽ, ag tỹ Topê mỹ nén ù pũn ke tũ vẽ vẽ. Ag rãnrãj tũ vẽ vẽ, tag, Judá krê'krê ag, kỹ Moisés tóg ag to nén ù tó ja tũ nĩ

gé, ti tỹ Topẽ tũ ki rĩr ke tag rán kỹ. Hã ra Jesus tóg Topẽ tũ ag ki rĩr jẽ, ti tỹ tỹ Judã krẽ'krẽ ag kã ù nĩ ra. Topẽ tỹ ti mỹ vẽnĥ jykre tãg nĩm hã vẽ.

Jesus tỹ Melquisedeque ri ke nĩ

¹⁵Levi krẽ'krẽ ag vỹ Topẽ rãnrãj han kãn ki kagtĩg ja nĩgtĩ. Hã kỹ Topẽ tóg ã tũ ki rĩr ke ù jé prẽr, ù tỹ Melquisedeque ri ke ẽn, hã vỹ: ẽg Senhor tỹ Jesus, he mũ. Hã ki ẽg tóg vég tí, Levi krẽ'krẽ ag tỹ ti rãnrãj han ki kagtĩg nỹtĩ ti. ¹⁶Kỹ ẽg Senhor tỹ Jesus pí(jé) ẽprã ke ag jykre ri ke han kỹ Topẽ tũ ki rĩr mũ', kỹ ẽprã ke ù vỹ: “ha ki rĩr,” he ja tũ nĩ gé. Topẽ tỹ ti mỹ nén tó jan hã vẽ. Ter mãn ke tũ ti nĩ ha, hã kỹ tóg ki rĩr há han mũ ha. ¹⁷Ti to tag tóg rán kỹ nĩ, Topẽ vĩ tỹ rán kỹ nĩ ki, ha mẽ: “isũ ki rĩr jé ã tóg ke mũ. Tũ' henh ke tũ (pẽ) ti nĩ, ã tỹ isũ ki rĩr nĩ ti, Melquisedeque tỹ isũ ki rĩr nĩ ẽn ri ke,” he ja ti nĩ. ¹⁸Tag tó kỹ tóg Moisés jykre ẽn tỹ tũ' he mũ, ti krój nĩn kỹ, ti tỹ ẽg há han mãn ki kagtĩg nĩn kỹ. ¹⁹Hỹ, Moisés jykre ẽn vỹ ẽg tar han ki kagtĩg ja nĩgtĩ, ẽg tỹ Topẽ vĩ ki króm han ki kagtĩg ja tóg nĩgtĩ, kỹ ẽg ti jykre han sór mũ ra kãnhkã tá jun ke tũ nĩ, ẽg tỹ Moisés jykre han mũ ra. Vãhã Topẽ tóg ẽg mỹ vẽnĥ jykre tãg nĩm ja nĩ, ù tỹ Moisés jykre kãfór nĩ ẽn, hã vỹ: Jesus jykre, he mũ. Kỹ ẽg tóg Jesus tugrĩn Topẽ nigja tá junjun ke mũ.

²⁰Tag to Topẽ tóg vĩ kãfór han ja nĩ. Moisés tỹ Levi krẽ'krẽ mỹ: “Topẽ tũ ki rĩrmnĩ,” hen kỹ tóg vĩ kãfór han ja tũ nĩ. ²¹Hã ra Topẽ tóg Jesus mỹ tag tó. Ti mỹ tóg: “isũ ag ki rĩr jé ã tóg ke mũ,” he ja nĩ. “Tũg ke tũ ti nĩ, ã tỹ isũ ag ki rĩr tĩ ẽn ti. Vĩ kãfór han inh mỹr. Tó ù han mãn ke tũ sóg nĩ, vẽnĥ jykre ù han mãn ke tũ sóg nĩ,” he ja tóg nĩ, ẽg jóg mág ti, ã kósĩn mỹ. ²²Hã kỹ Jesus jykre vỹ Moisés jykre kãfór nĩ, Jesus tỹ ẽg mỹ vẽnĥ jykre tãg nĩm mũ ẽn. ²³Nén ù ki tóg sir Moisés jykre ri ke tũ nĩ, Jesus jykre ti, ha mẽ. Moisés jykre ki Topẽ tũ ki rĩr ti ag vỹ e ja nỹtĩgtĩ. Ajag kã ù ter kỹ ag tóg jagnẽ jẽgja kã ù fẽg' he ja nĩgtĩ, ti tỹ Topẽ mỹ ti tũ ki rĩr jé. Hã kỹ ag tóg e ja nỹtĩgtĩ, Moisés jykre ki Topẽ tũ ki rĩr ti ag. ²⁴Hã ra Jesus vỹ ter mãn ke tũ nĩ inhhã, Topẽ tũ ki rĩr tóg nĩ nĩ, ù tóg ti jẽgja kã jẽnĥ ke tũ nĩ. ²⁵Hã kỹ tóg ã tỹ ùn ki rĩr nĩ mũ ag kar krenkren han tĩ, ù tỹ ti tugrĩn Topẽ jamã tá junjun ke mũ ẽn ag kar. Rĩr tóg nĩ nĩ, kỹ tóg ẽg jagfy Topẽ mré vēmén tĩ. Kurã krỹg ja tũ ti nĩ, Jesus ti.

²⁶Ëg to ti há nĩ, Jesus ti, ti tỹ ẽg jagfy Topẽ tũ ki rĩr nĩn kỹ. Topẽ kósĩn vỹ tỹ ti nĩ. Kygnẽ ja tũ pẽ ti nĩ. Nén ù kórég venĥ ke tũ ẽg nĩ, ti ki. Topẽ vĩ mranĥ tĩ ag mré ke tũ vẽ. Kỹ tóg tỹ kãnhkã tãn kar ag kri ke nĩ gé sir, ùri. ²⁷Ëprã ke ag tỹ Topẽ tũ ki rĩr nỹtĩn kỹ ag tóg ajag tỹ Topẽ vĩ mranĥ ja tugrĩn Topẽ mỹ nén ù pũn vén tĩ, kurã kar kí, kar kỹ ag tóg ajag mré ke ag tỹ Topẽ vĩ mranĥ tugrĩn ag jagfy Topẽ mỹ nén ù pũn tĩ gé sir. Jesus vỹ Topẽ vĩ mranĥ ja tũ nĩ inhhã. Hã kỹ tóg, ã tỹ vẽnĥ fẽg kỹ tóg ag tỹ Topẽ mỹ nén ù pũn ri ke han. Vẽnĥ fẽg pir han tóg, kỹ tóg ã tỹ vẽnĥ fẽg pir ẽn ki ẽg tỹ Topẽ vĩ mranĥ e ja ẽn tỹ tũ' he kãn. ²⁸Moisés tỹ ẽprã ke ag mỹ: “Topẽ tũ ki rĩr,” hen kỹ ag tóg ki rĩr mũ, hã ra ag tóg kygnẽ mág kỹ nỹtĩ ja nĩgtĩ gé, ag tỹ tỹ ẽprã ke nỹtĩn kỹ. Hã ra Topẽ tóg vẽnĥ jykre tãg han kỹ tóg ã kósĩn mỹ: “ki rĩr jé ã tóg ke mũ, tag to sóg vĩ kãfór han mũ,” he ja nĩ. Ù tỹ kygnẽ ja tũ pẽ ẽn mỹ tóg tag tó ja nĩ, hã kỹ tóg kygnẽnĥ ke tũ pẽ nĩ gé.

Jesus hã tÿ êg jagfy Topê tũ ki rĩr

8 ¹Ha mẽ, sÿ ãjag mÿ nén kãmén ja ti. Tag tó sór ja inh nĩ, ha mẽ. Êg jagfy Topê tũ ki rĩr tĩ to pã'i mág hã vÿ nĩ nĩ. Topê pëgja tá tóg nĩ nĩ, kanhkã tá. ²Topê nig jafã pë tá tóg ti tũ ki rĩr mũ. Topê nigja pë ên pi(jé) tÿ êprã ke ag tÿ há nĩ'. Topê hã tÿ há vë, ên ti. Ên tá tóg nĩ nĩ, êg jagfy, Topê tũ ki rĩr nĩ ên ti.

³Topê tũ ki rĩr tĩ to pã'i mág jykren hã vë, ha mẽ. Topê mÿ ag tóg nén ù nĩ pũn tĩ, nén ù ù ke gé. Kÿ ù tÿ êg jagfy Topê tũ ki rĩr tĩ to pã'i mág tag vÿ Topê mÿ nén (ũ) nĩm ke mũ gé, Jesus ti, hã vÿ: vënh fëg, he mũ. ⁴Ti tÿ ver tag mĩ ga kri mũ ag mré ga kri tĩ ra Topê tóg ti mÿ vënh rãnrãj tag nĩm ke tũ nĩ vë, ti tÿ Topê tũ ki rĩr jé. Êprã ù tÿ Topê tũ ki rĩr mũ ag vÿ nÿtĩ ver, ù tÿ Judeu ag jykre ki Topê tũ ki rĩr mũ ù ag. ⁵Topê jo ãn krêm ag tóg nén ù nĩ pũn tĩ, Moisés tÿ ag mÿ vënh jykre nĩm kÿ. Topê vÿ Moisés mÿ tó ja nĩ, ti tÿ kur tÿ Topê jo ãn han jé. Ti mÿ tóg: “ã mÿ sóg ã tÿ nén han ke mũ ên ti ven kãn huri,” he mũ. “ã tÿ pãnónh kri nĩ ên kã sóg ã mÿ ven kãn. Sÿ ã mÿ nén ven mũ ên hã han nĩ,” he ja tóg nĩ, Topê ti, Moisés mÿ, hã kÿ tóg han. ãn ên krêm ag tóg ùri nén ù ù pũn tĩ, Judeu ag jykre ki, Topê tũ ki rĩr tĩ ag. Hã ra tóg tÿ kanhkã tá vënh jykre tag hã pë tũ nĩ ver. Nén sĩ ki tóg ri ke nĩ, ag tÿ nén han mũ ti, kanhkã tá vënh jykre ri ke sĩ ti nĩ. Jesus hã vÿ kanhkã tá vënh jykre pë ên han kãn mũ.

⁶Hã kÿ Jesus rãnrãj vÿ êprã ke ag rãnrãj kãfór nĩ. Topê vÿ êg mÿ Jesus jënê, ti tÿ êg mÿ vënh jykre tãg nĩm jé, kÿ tóg ti tÿ Moisés tÿ êg mÿ vënh jykre há nĩm ên há kãfór nĩ. Kÿ tóg êg mÿ nén ù há tãvĩ han ke mũ, Topê ti, ti tÿ Jesus jënên kÿ. Hã kÿ Jesus rãnrãj vÿ Moisés rãnrãj kãfór nĩ, Jesus tÿ êg mÿ vënh pãte fón ken kÿ. ⁷Topê mÿ tóg pãgsĩ ja nĩ, ã tÿ Moisés mÿ vënh jykre nĩm ja ên ti, hã kÿ tóg vënh jykre tãg han to jykren ja nĩ. ⁸ã povo jykre ve kÿ tóg ti mÿ kórég nĩ, hã kÿ tóg tag tó, ha mẽ. “Kãnhmar sóg povo tÿ Israel mÿ vënh jykre tãg nĩm ke mũ, Judá krê!krê ag mÿ ke gé,” he ja tóg nĩ, êg jóg mág ti. ⁹Vënh jykre tãg tag vÿ isÿ ag jóg!jóg ve ag mÿ vënh jykre nĩm ja ên ri ke tũ nĩnh mũ. Ag jóg!jóg ve ag mÿ sóg vënh jykre ù nĩm ja nĩ gé, isÿ ga tÿ Egito tá ag kãpan kÿ. Ag nigé kãgmĩ kÿ sóg ag tafĩn kãtĩ mũ, ag ga pë ra. Hã ra ag tóg isÿ ag mÿ vënh jykre nĩm ja ên mranh, hã kÿ sóg sir ag togvãnh ja nĩ,” he tóg, êg jóg mág ti. ¹⁰“Hã ra sóg vãhã ag mÿ vënh jykre tãg han sór mũ, povo tÿ Israel ag mÿ, ha mẽ,” he tóg, êg jóg mág ti. “ãjag krĩ tÿ ag tóg isÿ ag jyvên mũ ên ki kanhrãn ke mũ, kÿ ag tóg han sór ke mũ gé, ti tÿ ag fe kãkã nĩn kÿ. Ag Topê vÿ tÿ inh nĩnh mũ, kÿ ag tóg tÿ inh krê nÿtĩnh ke mũ gé, ên kã. ¹¹Kÿ ù tóg ã mré ke ag kanhrãn mãn ke tũ nĩ ha. “Êg jóg mág vÿ ge nĩgtĩ, ge ti nĩgtĩ,” he mãn ke tũ ag nÿtĩ ha, jagnê mÿ. Ag kar vÿ inh ki kanhró nÿtĩnh mũ, ên kã, ùn kãsir ag, ùn mág ag ke gé, ên kã. ¹²Ag tÿ inh vĩ mranh mũ (hã) ra sóg ge ra ag jagãgtãn ke mũ. Vënh pãte fón jé sóg ke mũ, ag tÿ inh vĩ mranh ja ên ti,” he ja tóg nĩ, Topê ti.

¹³Kÿ, Topê tÿ vënh jykre tãg han kÿ vënh jykre ve ên vÿ ti mÿ tÿ vënh jykre si nĩ sir. Hã ra nén (ũ) si kar ên vÿ kejên tũ' henh ke mũ, kãnhmar.

Vāsŷ Topē jykre mré ũri Topē jykre

9 ¹Topē tŷ ag mŷ vēnh jykre ve ěn nĭm kŷ tóg ag mŷ ag tŷ nĕn han ke ěn kāmĕn ja nĭ. Ag tŷ ti jo ĩn han tó ja ti nĭ, kar kŷ tóg ag tŷ ti jo ĩn krĕm ti mré vēmĕn ke tó ja nĭ gé, ag tŷ ti mŷ nĕn (ũ) pũn ke ti ke gé. ²Kŷ ag tóg kur tŷ ĩn ěn han, ti tŷ tŷ Topē jo ĩn jĕ jĕ. Hā ra tóg vēnh kápām kŷ nĭ, kur tŷ ke gé, kŷ ag tóg ĩn vāfynyn ki jun vén mũ ěn to ag tóg: “Topē mré vĭ jafā,” he tĭ. ěn tá mesa kri vela tŷ kri vin jafā vŷ jĕ, kar kŷ mesa ti ke gé, mesa tŷ kri pāo vin jafā ěn. ³Tag pāte tóg kur nĭ, jānkā tŷ kur, kŷ kur ěn pāte ĩn vāfynyn ũ vŷ nĭ gé, ũn sĭ. ěn to ag tóg: “Topē nĭg jafā,” he tĭ, ĩn vāfynyn ěn to. ⁴Tá tóg Topē mŷ kri nĕn (ũ) pũn jafā nĭ, ouro tŷ há ti. Kri ag tóg nĕn ũ ger há pũn tĭ, ouro ěn kri. Kar kŷ Topē caixa vŷ tá nŷ gé. Ti to tĭr hā vŷ tŷ ouro nĭ. Caixa ěn kākā ouro tŷ pĕnky vŷ nĭ, kŷ kanhkā tá vējĕn vŷ pĕnky ěn ki nĭ, Topē tŷ ag mŷ pāo jĕnĕ ěn ti, ag tŷ ga kórĕg kri mũn kŷ. Kar kŷ Arāo vātó vŷ kā nŷ gé, ti kātó ti, kātó fĕj mũ ěn ti. Caixa ěn kākā tóg nŷ nĭ, vātó ěn ti. Kar kŷ Topē tŷ Moisés mŷ vēnhrá nĭm ja ěn vŷ kākĭ nŷtĭ gé, caixa ěn kākĭ. Pó régre ki tóg ránrán ja nĭ, Moisés ti, Topē tŷ ěg jyvĕn mũ ěn ti. Pó régre ěn tóg caixa kākĭ nŷtĭ gé. ⁵Caixa ěn kri tóg nŷtĭ, Topē tŷ jĕgnĕ jafā régre ag kággrá, querubim he mũ ěn, ũ tŷ Topē rĭnja tá nŷtĭ ěn. Fĕr ag nŷtĭ, kŷ ag fĕr tóg krŷg he kŷ nŷtĭ. Ag fĕr fĕnja krĕm Topē vŷ ěg mŷ vēnh pāte fón tĭ, ěg tŷ ti vĭ mranh ja ti. Hā ra sóg tag kāmĕn kĕn sór tũ nĭ ver.

⁶Kŷ tóg vāfynyn régre nĭ, ĩn tŷ kur ěn ti, Topē tũ ěn ti. Ti vāfynyn ve ki ag tóg kāra ge tĭ, Topē tũ ki rĭr tĭ ag, kurā kar ki. Tá ag tóg ājag rānhrāj ti han tĭ. ⁷Ti vāfynyn ũ ěn tá tóg kāra rā pin' he tĭ, prŷg kar ki, ag to pā'i mág ti, ti tāvĭ. Ag mĕg kyvénh ma tóg tĭ tĭ, Topē mŷ ven jĕ, Topē tŷ ti mŷ vēnh pāte fón jĕ, povo kar mŷ ke gé, ag tŷ Topē vĭ mranh ja ěn ti, ag tŷ mranh sór tũ ra mranh ja ěn ti.

⁸Topē kuprĭg vŷ ěg mŷ kāmĕn mũ, ũri, vēnh jykre si ěn ti. Kur tŷ ĩn vāfynyn vŷ ge nĭ, ha mĕ. Ti vāfynyn ve ěn tŷ ver ĩn krĕm nĭn kŷ ěg tóg ti vāfynyn ũ tá jun ke tũ nĭ ver, Topē nĭgjafā tá. ⁹Ěg tŷ ũri vég mũ tag ki kanhrān jĕ, hā jĕ Topē tóg vēnh jykre tag han ja nĭgtĭ, ěg tŷ to comparaçāo han jĕ. Topē jo ĩn ěn tá ag tóg Topē mŷ nĕn ũ pũn tĭ, kŷ ag tóg ag mĕg ti tānh kŷ pũn tĭ gé. Ag tŷ Topē mŷ sĭnvĭ nŷtĭ sór vē, hā jĕ ag tóg ti mŷ nĕn (ũ) pũn tĭ. Hā ra ag tóg ti mŷ pũn mũ ra (ag tóg ti mŷ) sĭnvĭ tũ nŷtĭ, ag jykre tŷ ver kórĕg nĭn kŷ. ¹⁰Kŷ, ag tŷ ti mŷ pũn hā han jĕ ag tóg vēnh jykre tŷ ge han tĭ gé, ha mĕ: vējĕn to ag tóg jykrĕn tĭ, kŷ ag tóg vējĕn ũ to: “tag konh ke tũ ěg nĭ, tag kron ke tũ ěg nĭ,” he tĭ, ti tŷ ag mŷ tó kŷ nĭn kŷ. Kŷ ag tóg goj tŷ vēnh kygpe tŷ hĕn ri ke han han tĭ gé. Tag ki vēnh jykre kar vē, ěprā. Kŷ Topē tŷ vēnh jykre tåg han kŷ ěn vŷ tóg tũ' he mũ sir.

¹¹Vāhā Cristo vŷ hur kātĭg, kŷ tóg tŷ ěg jagfy Topē tũ ki rĭr to pā'i mág nĭ ha, kŷ tóg ěg kren pĕ han mũ. Ti tŷ Topē jo ĩn kāra rā vŷ ĩn si ěn mág kāfór nĭ gé. Há tāvĭ ti nĭ, Jesus tŷ hĕ tá Topē tũ ki rĭr nĭ ěn ti. Ěprā ke tŷ ĩn há pijĕ', tag ki ĩn pijĕ', kanhkā tá ke vē. ¹²Kŷ, Jesus tŷ ěn kāra rā kŷ tóg rā pir han, Topē nĭgjafā pĕ ěn kāra, Topē tŷ ěg mŷ vēnh pāte fón jĕ.

Kỹ tóg, ã tỹ kãra rã kỹ ti pi(jé) ag mễg kyvénh ma vyr', cabrito ên, monh tãgy ên. Ǻ kyvénh hã tỹ tóg êg kren pẽ han, Jesus ti.

¹³Ũ ter kỹ ù tỹ ti va mũ mũ ên ag vỹ, ag tỹ Topẽ jo ìn kã ra ge sór kỹ ag vỹ Topẽ tũ ki rĩr tĩ ag mỹ: “ha êg to tỹ kó kó hé, êg mễg kyvénh tỹ,” he tĩ. Ag tỹ ag to tỹ kó kó he kar kỹ ag tóg jãnhkri nỹtĩ sir, ag tỹ cabrito kyvénh tỹ ag to tỹ kó kó hen kỹ, ke tũ nĩn kỹ monh kyvénh tỹ, ke tũ nĩn kỹ monh fi pũr tỹ mrěj tỹ. Ag tỹ ag jãnhkri han jan hã vẽ. ¹⁴Hã ra Cristo vỹ ã kyvénh hã tỹ êg jãnhkri pẽ han. Topẽ kuprĩg tỹ ti krĩn kỹ tóg Topẽ mỹ vễnh fễg, Cristo ti. Kygnẽ ja tũ pẽ ti nĩ, hã kỹ tóg há kar nĩ, ti tỹ vễnh fễg kỹ. Ti kyvénh vỹ êg jãnhkri pẽ han mũ, êg jykre mré tóg êg kuryj han mũ, kỹ êg tóg vễnh jykre kórég han mãn ke tũ nĩ sir, êg tỹ êg jykre si tũgrĩn ter ke mũ ên ti. Vãhã êg tóg Topẽ tũ han há nĩgtĩ, ùn rĩr nĩ ên tũ ti.

Cristo tỹ êg mỹ vễnh jykre tãg ma kãtĩg

¹⁵Hã kỹ Cristo vỹ êg mỹ vễnh jykre tãg ma kãtĩg. Ter ja tóg nĩ, Topẽ tỹ êg mỹ vễnh pãte fón jé, êg tỹ ti jykre ve mranh ên ti. Ti ter kar kỹ Topẽ tóg ù ag kuprễg huri, ag tỹ Topẽ tỹ kanhkã tá êg mỹ nén ven ke ên ki kanhrãn jé. Jesus tỹ êg mỹ han hã vẽ.

¹⁶Kejẽn ù tóg ã ter ke to hã: “iser kar kỹ ên vỹ isũ tag mãn ke mũ, ù ên vỹ isũ ù mãn ke mũ gé,” he tĩ. Rãn tóg tĩ, tag, kỹ tóg tógfĩg tĩ, vễnh rá ti. Kỹ ag tóg ag tỹ vễnh rá ên ve sór mũ ra ag tóg ti ter kar kỹ hã vég tĩ. ¹⁷Ti tỹ ver ter tũ nĩn kỹ ag tóg vễnh rá ên venh ke tũ nĩ. “Iser kar kỹ,” he tóg, hã kỹ ù tóg ver ti tũ mãg tũ nĩ, ti tỹ ver ter tũ nĩn kỹ, ù tỹ rãn mũ ên ti. ¹⁸Ri ke ti nĩ, Topẽ tỹ êg mỹ vễnh jykre nĩm ja ên ti, ti si mré hã. Ag mễg ter kar kỹ ke ja vẽ. ¹⁹Hã kỹ Moisés vỹ povo kar mỹ Topẽ tỹ ti mỹ nén tó ja ên kãmén, Topẽ tỹ nén to ag jyvẽn mũ ên ti. Ti tỹ ag mỹ kãmén kar kỹ tóg monh tãgy tãnh kỹ ti kyvénh mãn ja nĩ, cabrito tãnh kỹ ke gé. Goj mãn kỹ tóg ki kujẽn ja nĩ gé, kỹ tóg tỹ kujãjãg mũ, goj mré tóg ti kujãjãg mũ sir, carneiro kyki kusũg mré hã tóg tỹ kujãjãg mũ sir, re no fej mré hã. Kỹ tóg livro kri tỹ kó he mũ, to tỹ krig ke tóg mũ gé, povo kar to tóg tỹ kó kó he mũ gé, ag tỹ jãnhkri kỹ nỹtĩ jé. ²⁰Ag to tỹ krig ke kar kỹ tóg ag mỹ: “Topẽ tỹ êg mỹ nén han ke mũ to vễnh kyvénh hã vẽ,” he mũ, “Topẽ tỹ êg mỹ vễnh jykre nĩm mũ to vễnh kyvénh hã vẽ,” he tóg mũ, Moisés ti. ²¹Kar kỹ tóg ìn tỹ kur to tỹ krig ke mũ gé, pénky kar to tóg tỹ kó he mũ gé, ag tỹ Topẽ tũ han jafã kar to. Vễnh kyvénh ên tỹ tóg kri tỹ kó he kãn mũ, ag kar jãnhkri nỹtĩ jé. ²²Ha vé, ag tỹ vãsỹ Topẽ jykre ên ki nén ù tỹ jãnhkri' he sór kỹ ag tóg nén ù kyvénh hã tỹ jagnẽ jãnhkrig tĩ. Pir ti nĩ, ag tỹ nén ù kyvénh tũ ra tỹ jãnhkri' ke mũ ti. Hã kỹ êg tóg ki kanhró nỹtĩ. Êg tỹ Topẽ vỹ mranh kỹ tóg êg mỹ êg mễg ter hã tũgrĩn vễnh pãte fón ja nĩgtĩ, vãsỹ vễnh jykre ên ki.

Cristo tỹ êg jagfy ter pir han

²³Vễnh jykre ên vỹ kanhkã tá vễnh jykre ri ke sĩ nĩ, hã kỹ vễnh mễg kyvénh vỹ nén kar ên jãnhkri han ja nĩgtĩ. Êg tỹ hã ra kanhkã ve jé tóg há tũ nĩ, êg mễg tỹ êg jagfy ter mũ ti. Êg mễg vỹ êg tỹ kanhkã tá jun han ki kagtũg nĩ. ²⁴Cristo hã vỹ êg tỹ tá jun han ke mũ. Kỹ tóg êprã ke tỹ Topẽ jo ìn kãra rã ja tũ nĩgtĩ gé, kanhkã jykre

ri ke sī ěn kãra rã ja tũ ti nĩ. Kanhkã pẽ ra tóg vyr, ký tóg Topẽ rinja tá nĩ nĩ, Topẽ mré vēmén jé, ěg jagfy. ²⁵Ký ěprã ke ěn tóg ěprã Topẽ tũ ki rĩr tí to pã'i mág ěn tóg prýg kar ki ag tý ěn vãfynyn to: Topẽ nigjafã, he mũ ěn kãra tóg rã tí, ag mĕg kyvĕnh mãn ký tóg ra rã tí. Hã ra Cristo vỹ vĕnh fĕg pir han. ²⁶Ti tý prýg kar ki vĕnh fĕg mũ ra tóg ter tý hĕn ri ke han ke vĕ vĕ, Topẽ tý ga han kar ký. Hã ra tóg vãsỹ vĕnh ven ja tũ nĩ. Uri, kurã tý ěgno to hã tóg vĕnh ven pir han, ký tóg vĕnh fĕg pir han, ěg tý Topẽ vĩ mranh ěn tý tũ' he jé, ã ter tugrĩn. ²⁷Ěprã ke ag vỹ ter pir han tí gé. Ěg ter kar ký Topẽ vỹ ěg jykre tugnỹm ke mũ. ²⁸Tag ri ke ti nĩ, Cristo tý vĕnh fĕg mũ ti. Vĕnh fĕg pir han tóg, ã tý ùn e tý Topẽ vĩ mranh tý tũ' he jé. Kejĕn tóg kãtig mãn ke mũ. Hã ra tóg ěg tý Topẽ vĩ mranh ja tugrĩn ter mãn ke tũ nĩ, ti kãtig mãn ký. Ěg jé prĕr jé tóg kãtig ke mũ, ti tý ù tý ti kãtig jãvãnh mũ ag jé prĕr jé.

10 ¹Ěg tý Judeu ag jykre ve ký ěg tóg ve sĩ han tí, Topẽ tý ěg mỹ nĕn han sór mũ ti. Prýg kar ki ag tóg Topẽ mỹ tãnh ký pũn', tãnh ký pũn' he tí. Hã ra ag mĕg tý ag jagfy ter mũ ra tóg ag jykre há han ki kãtig ja nigti. ²Ag tý Topẽ mỹ nĕn (ũ) pũn mũ ra ag tóg Topẽ vĩ mranh mãn', mranh mãn' he tí. Ag tý mranh tũ nĩ ra ag tóg ti mỹ pũn mãn ke tũ nĩ vĕ, ti tý ag mỹ vĕnh pãte fón jé. Hã ra ag tóg ki kanhró nỹti, ag tý ti vĩ mranh tí tag, hã ký ag tóg ti mỹ nĕn pũn tovãnh tũ pĕ nigti, ti tý ag mỹ vĕnh pãte fón tovãnh tũ nĩ jé. ³Prýg kar ki ag tóg Topẽ mỹ pũn tugrĩn (ag tóg) ag tý ti vĩ mranh ja ěn mĩ ěkrég tí. ⁴Hỹ, monh kyvĕnh vỹ ěg tý Topẽ vĩ mranh tý tũg' hĕnh ke tũ pĕ nĩ, cabrito tý ěg jagfy ter mũ ěn ti ke gé. ⁵Hã ký Cristo tóg, ã tý ga kri mur ken ký (tóg) Topẽ mỹ: “ag tý ãjag mĕg tãnh ký pũn mũ ra tóg tý nĕn ù tũ nĩ ã mỹ,” he ja nĩ. “Ag tý ã mỹ nĕn ù ù pũn mũ ra tóg ã mỹ tý nĕn ù tũ nĩ gé. Hã ra ã tóg inh mỹ inh fãr ti nĩm, isỹ ag jagfy ter jé. ⁶Ag tý ã mỹ ag mĕg pũn mũ ra tóg ã mỹ sér tũ nĩ, ag tý ã mỹ nĕn ù ù pũn mũ ra. Ag tý ã vĩ mranh tag tý tũ' he ki kãtig tóg nĩ, ag tý ã mỹ nĕn pũn mũ tag. ⁷Hã ký sóg ã mỹ: “ha vé, sỹ ã mỹ vĕnh fĕg ke vĕ,” he mũ, “isỹ ã tý inh ki nĕn ve sór mũ ěn tý ã mỹ han jé,” he sóg mũ. Hã ký tóg rán ký nĩ, iso, ã vĩ rá ki,” he tóg, Cristo ti, Topẽ mỹ.

⁸Ti mỹ tóg tag tó vĕn, ha mĕ. “Ag tý ãjag mĕg tãnh ký pũn mũ ra tóg tý nĕn ù tũ nĩ ã mỹ. Ag tý ã mỹ ãjag mĕg pũn mũ ra tóg ã mỹ sér tũ nĩ, ag tý ã mỹ nĕn ù ù pũn mũ ra. Ag tý ã vĩ mranh tag tý tũg' he ki kãtig tóg nĩ, tag,” he vĕn tóg. Hã ra tóg rán ký nĩ, Judeu ag tý Topẽ mỹ tag pũn jé. Ge ra Jesus tóg tag to: “nĕn ù tũ vĕ,” he ja nĩ. ⁹Tag tó kar ký tóg Topẽ mỹ: “ha vé, sỹ ã mỹ vĕnh fĕg ke vĕ, isỹ ã tý inh ki nĕn ve sór mũ ěn tý ã mỹ han jé,” he mũ gé, Topẽ mỹ. Æ tý tag tó ký tóg vĕnh jykre si ěn tý tũ' he mũ, ùn tãg han jé. ¹⁰Jesus tý Topẽ vĩ ki króm ja tugrĩn ěg tóg uri tý Topẽ krĕ nỹti ha. Jesus Cristo vỹ ěg jagfy ter ja nĩ, vĕnh fĕg ký. Ti ter pir ki tóg ěg név(e) kajãm kãn, ký Topẽ tóg ěg mỹ vĕnh pãte fón kãn mũ sir.

¹¹Ěprã ke ag tý Topẽ tũ ki rĩr tí ag vỹ kurã kar ki ãjag rãnrãj han tí, Topẽ tũ ki rĩr jé. Kurã kar ki ag tóg Topẽ mỹ ãjag mĕg tãnh ký pũn tí, hã ra ag tý Topẽ mỹ nĕn pũn mũ ěn pi(jé) ag tý Topẽ vĩ mranh tý tũ' he ja nigti. ¹²Ag jãvo Jesus Cristo vỹ vĕnh fĕg pir han, ã ter tugrĩn tóg ěg tý Topẽ vĩ mranh ěn tý tũ' he kãn. Tag han kar ký tóg Topẽ pĕgja tá nĩ nĩ. ¹³Tá tóg nĩ nĩ. Topẽ vỹ ti kato vãsãnsãn mũ ag tý ti pĕn krĕm vin ke mũ. Ag sigse ký nỹti to ken hã vĕ. Tag hã jãvãnh tóg nĩ nĩ, Jesus

ti. ¹⁴Ti tỹ vĕnh fĕg pir ĕn tugrĭn tóg Topĕ krĕ kar ag krenkren han kĕn huri, kỹ ĕg Topĕ mỹ sĭnvĭ nỹtĭ. ¹⁵Topĕ kuprĭg vỹ ĕg mỹ tag tó tĩ gé. Tag tó tóg mũ, ha mẽ. ¹⁶“Tag pĕte sóg ag mỹ vĕnh jykre tĕg han ke mũ,” he tóg, ĕg jóg mág ti. “Vĕnh jykre tĕg ĕn hĕ vĕ, ha mẽ. Isỹ nĕn to ag jyvĕn mũ ĕn tỹ sóg ag fe kĕkĕ nĭm ke mũ, kỹ tóg sỹ ag krĭ ki rĕn ri ke nĭnh mũ sir, kỹ ag tóg han sór ke mũ,” he tóg. ¹⁷Tag tó kar kỹ tóg tag tó gé, ha mẽ. “Ag tỹ inh vỹ mranh ja ĕn mĩ ĕkrĕn mĕn ke tũ inh nĩ ha, ag jykre pĕno ĕn mĩ ĕkrĕn mĕn ke tũ pĕ inh nĩ ha,” he tóg mũ gé. ¹⁸Ha vé, Topĕ tỹ ĕg mỹ vĕnh pĕte fón kỹ ĕg tóg ti mỹ nĕn ũ pũn mĕn ke tũ nĩ ha, ti tỹ ĕg mỹ vĕnh pĕte fón kĕn kỹ nĭn kỹ, ĕg tỹ ti vỹ mranh ja kar ĕn ti.

Ēg tỹ Topĕ to krónh ke tũ

¹⁹Inh kanhkĕ, Jesus tỹ ĕg jagfy ter tugrĭn ĕg tóg jatun mỹ Topĕ nĭgjařĕ tá jun ke mũ. ²⁰Jesus tỹ ĕg jagfy ter ĕn tóg ti tỹ kur tỹ jĕnkĕ ĕn fĭn rĕm ri ke nĩ, ĕg tỹ ti nón fĭn rĕm ri ke han jé, ĕg rĭnrĭr nỹtĭ jé. Topĕ jo ĭn krĕm kur tỹ jĕnkĕ nĭfe ĕn vỹ jaran ke kỹ sa nĩ, Jesus ter kỹ. Kỹ ĕg tóg rĕ genh hĕ nỹtĭ ha. ²¹Ēg jagfy Topĕ tũ ki rĭr tĩ to pĕlĩ mág vỹ nĩ nĩ, hĕ vỹ: Jesus, he mũ. Topĕ jamĕ tá ke ĕn ag kar kri ke vỹ tỹ ti nĩ. ²²Kỹ jatun mỹ Topĕ mrĕ vĕmĕn nĩ. Ti ki rĕ hĕ han nĩ, ĕjag fe tỹ ti ki gemnĩ, ĕjag tỹ ti nĭgjařĕ tá junjun jé. Ón kỹ ti ki ge sór tũg nĩ. Ēg jĕnhkri han tóg, ĕg jykre pĕno kar tỹ tóg tũ' hĕ, ĕg tỹ to jykřĕn mĕn tũ nĩ jé. Ēg tỹ jĕnhkri han tóg, ĕg tỹ goj jĕpri tỹ vĕnh kype ĕn ri ke, kỹ ĕg hĕ nỹtĭ. ²³Ti tỹ ĕg mỹ nĕn tó mũ ĕn mĩ ĕkrĕn nĩ, to krónh ke tũg nĩ, sỹ ĕjag mỹ nĕn tó mũ ĕn to. Ve jé ĕg tóg ke mũ, ti tỹ ĕg mỹ nĕn tó mũ ĕn ti. ũ tỹ ĕg mỹ tó ja ĕn vỹ ón vĕnh nĭgtĭ, hĕ kỹ to krónh ke tũg nĩ.

²⁴Jagnĕ mĩ ĕkrĕn nĩ, ĕjag tỹ jagnĕ jyvĕn jé. “Vĕnh kar to hĕ nĭmnĩ,” hemnĩ jagnĕ mỹ. “Nĕn ũ hĕ kar han nĩ,” hemnĩ gé jagnĕ mỹ. ²⁵ũ ag tóg culto venh kĕmũ vĕnh nỹtĭgtĭ. Tag han tũg nĩ. Culto venh kĕmũmnĩ. Kỹ jagnĕ jyvĕn nĩ, ĕjag tar nỹtĭ jé. Kakó ti nĩ, ti kĕtĭg mĕn ke kurĕ ti. Ve hĕ ti tĩ ha, tag.

²⁶Ha vé, Topĕ vỹ mĕ kĕn ĕg huri. Ēg tỹ ti ki rĕ kar kỹ culto venh kĕtĭg tũ nĩ' hen kỹ, ĕg tỹ ge ra Topĕ vỹ mranh sór kỹ mranh tĩ kỹ tóg ũ tỹ ĕg jagfy kajĕm mĕn ke tóg tũ tĩ. ²⁷Hỹ, ĕg tỹ mranh sór kỹ mranh kỹ Topĕ vỹ ĕg vóg kónĕn pĕ han ke mũ. Pĩ tỹ tóg ag tỹ tũ' henh ke mũ, Topĕ ti, ũ tỹ ti kato vĕsĕnsĕn mũ ag. ²⁸ũ tỹ Moĭsĕs tỹ ĕg jyvĕn mũ ĕn mĕ jĕvĕnh nĩ ĕn tĕn ja ag tóg nĭgtĭ, Israel ag, ũn rĕgre ag tỹ ti jykre pĕno ve ja tag tugrĭn, ke tũ nĭn kỹ ũn tĕgtũ ag. Ti jagĕgtĕn ja tũ ja ag nĭgtĭ, ũn jykre pĕno ĕn. ²⁹Hĕ ki ĕg tóg vĕg mũ, Topĕ tỹ ĕg vóg kónĕn pĕ han ke mũ ti, ĕg tỹ Topĕ kósin to é he kỹ, ĕg tỹ ti vỹ mranh sór kỹ. Ēg tỹ mranh sór kỹ ĕg tóg ti kyvĕnh to é he tĩ, ti jykre to. Ti tỹ ĕg jĕnhkri han ja ĕn to é he ĕg tóg tĩ sir. Ēg mỹ tóg tỹ nĕn ũ tũ nĩ sir, Topĕ kuprĭg tỹ ĕg jagĕgtĕn ja ĕn ti. ũ tỹ tag han mũ vóg kónĕn jé tóg ke mũ, Topĕ ti, ha vemnĩ. ³⁰Hĕ kỹ tóg tag tó, ha mẽ: “ũn jykre pĕno ag vóg kónĕn jé sóg ke mũ, ag tỹ kajĕm jé, ag tỹ nĕn ũ kórĕg han mũ kar,” he tóg, Topĕ ti. ũ tỹ tag tó mũ ki kanhró ĕg tóg nĩ mỹr. Hĕ ra tóg tag tó gé, ha mẽ. “Á mrĕ ke ag jykre tugnỹm jé tóg ke mũ, ĕg jóg mág ti,” he ja tóg nĩ gé. ³¹Rĭr ti nĩ, Topĕ ti. Ti tỹ ĕg to jũ nĭn kỹ tóg jagy tĕvĩ tĩ, nĕn ũ jagy kar kĕfór ti nĩ.

Ĕg tỹ to tar nỹtĩnh ke

³²Ājag tỹ vāsỹ ti mỹ vėnh fėg vėn ja ėn kurā mĩ ėkrėn nĩ. Ĕn kǎ ag tóg ājag kato vāsānsān mág, kỹ ājag tóg ag to vėsỹrėnh, kysǎ tỹ hėn ri ke ki, ājag tỹ Topė vĩ mē vėn ėn kǎ. Hǎ ra ājag tóg to krónh krónh ke ja tũ nĩgtĩ. ³³Ājag kǎ ũ to ag tóg vĩ kónān mág! he ja nĩgtĩ, ėn kǎ, Topė kato vāsānsān mũ ag, kỹ ag tóg ājag vóg kónān gé, hǎ ra vėnh kar vỹ vé, ag tỹ ājag vóg kónān ja ti. Ājag kǎ ũ vóg kónān ja ag tóg nĩgtĩ, kỹ tóg ājag kar mỹ jagy tĩ ja nĩgtĩ, ag mré, ājag tỹ tỹ ag mré Jesus ki ge nỹtĩn kỹ. ³⁴Kỹ ag tóg ājag kǎ ũ sigse ja nĩ gé. Kỹ ājag tóg ũn sigse kỹ nỹtĩ ėn ag jagǎgtǎn ja nĩgtĩ, ag tỹ ājag mré Jesus ki ge kỹ nỹtĩ kỹ. Pǎ'i ag tỹ ājag tỹ nén gég mũ ra tóg ājag mỹ sér nĩ ja nĩgtĩ. Ājag tỹ kanhkǎ tá nén ũ há tǎvi ėn vėnh ke hǎ mĩ ājag tóg ėkrėn ja nĩgtĩ, ag tỹ ājag tỹ nén gėnh kỹ, Jesus tugrĩn. Ājag tỹ kanhkǎ tá nén vėnh ke ėn vỹ tũ! hėnh ke tũ pė nĩ. ³⁵Kỹ ũri to krónh ke tũg nĩ gé. Ājag tỹ ti to tar nỹtĩn kỹ ājag tóg nén ũ há tǎvi vėnh ke mũ, ha mē. Ājag vėsỹrėnh ja ėn kaja ri ke ve jé ājag tóg ke mũ. ³⁶Ĕg tỹ ti tũ han to tar nỹtĩnh ke vė, ėg tỹ ti to vǎnh ke tũ pė nỹtĩnh ke vė. Tag hǎ vỹ há nĩ. Kỹ ājag tỹ Topė tỹ ėg mỹ nén tó mũ ėn han kǎn kỹ nỹtĩn kỹ ājag tóg vėnh ke mũ, ti tỹ ėg mỹ nén (ũ) ven ke mũ ėn ti. ³⁷Hǎ kỹ tag vỹ rán kỹ nĩ, Topė vĩ rán ki, ha mē: “kǎnhmar pė ti jun ke mũ, ũn kǎtig ke mũ ėn ti. Kǎtig mé han jé tóg ke mũ, ha vemnĩ. ³⁸Kỹ ũ tỹ inh ki ge kỹ nỹtĩ ėn ag hǎ vỹ krenkren ke mũ, inh mré ke ėn ag, isỹ ũn mỹ vėnh pǎte fón mũ ėn ag. Jǎvo ũ tỹ isovǎnh mũ ėn vỹ inh mỹ kórėg nĩnh mũ,” he tóg, Topė ti. ³⁹Ĕg pi(jé) ti to vǎnh ke mũ, kỹ ėg tóg ũ tỹ ti to vǎnh mũ ėn ag vǎgfor ėn ri ke han ke tũ nĩ gé. Ti ki rǎ kỹ ėg tóg nỹtĩ, hǎ kỹ ėg krenkren ke mũ.

Ũ tỹ ėg jo Topė ki ge kỹ nỹtĩ ag

11 ¹Topė ki rǎ to ken hǎ vė, hǎ vỹ: ti tỹ ėg mỹ nén tó mũ ėn kri nĩm, he mũ. Ti tỹ nén ũ to: “ve jé ājag tóg ke mũ,” he mũ ėn kri fi jé ėg tóg ke mũ, ėg tỹ ver vėg tũ ra. ²Ti si ag vỹ kri nĩm kỹ ti ki ge ja nĩgtĩ gé. Hǎ kỹ ag tóg Topė mỹ tỹ ũn há ja nỹtĩgtĩ, vāsỹ ke ag, ha mē.

³Ĕg tỹ Topė ki rǎ kỹ ėg tóg ki kanhró nỹtĩ, ti tỹ ǎ vĩ tỹ ėg tỹ nén vėg mũ kar hyn han ja ti. Ti vĩ vėg tũ ėg tóg nĩgtĩ, kỹ tóg ėg tỹ nén vėg tũ tỹ tóg ėg tỹ vėg mũ hyn han ja nĩgtĩ, Topė ti, ǎ vĩ tỹ tóg nén kar hyn han ja nĩgtĩ.

⁴Kỹ Abel vỹ Topė ki rǎ kỹ nĩ ja nĩgtĩ gé, hǎ kỹ tóg Topė mỹ pũn há han, ti tỹ ti mỹ ǎ mėg pũn kỹ. Jǎvo ti kǎke tỹ Caim vỹ ti ki rǎ ja tũ nĩ, kỹ tóg Topė mỹ nén ũ pũn tĩ (hǎ) ra (tóg) ti mỹ pũn kónān. Abel tỹ Topė ki rǎ kỹ tóg Topė mỹ pũn há han ja nĩ, Abel tỹ ti mỹ pũn mũ ėn ti. Topė tỹ Abel to: “inh mỹ tóg tỹ ũn jykre kurjy nĩ,” he ja vė, hǎ kỹ ti tũ tóg pũr há han. Ter ti huri, Abel ti, hǎ ra ėg tóg ti tỹ nén han ja tugrĩn Topė ki ge ki kanhrǎn mũ sir.

⁵Enoque vỹ Topė ki rǎ kỹ nĩ ja nĩgtĩ gé, hǎ kỹ Topė vỹ ti jé prėr, ti tỹ kanhkǎ ra tũg jé, ti rĩr ra, ti ter tũ ra. Ti ve mǎn tũ ag tóg, Topė tỹ ti jé prėr kar kỹ, hǎ ra tóg ǎ ter tũ ra kanhkǎ ra vyr. Topė tỹ ti jé prėr to hǎ tag vỹ ti to rán kỹ nĩ Topė vĩ tỹ rán kỹ nĩ ki, ha mē: “Topė tỹ ti jykre ve kỹ ti fe tóg

mrin ke mū,” he ja ti nī, Enoque to. ⁶Ēg tỹ Topē ki ge tũ nỹtĩn kỹ tóg ěg to há nĩnh ke tũ nī, Topē ti. Ēg tỹ Topē ra mū sór kỹ ěg tóg tag to jykrén ke mū, ha mẽ. “Topē vỹ nī,” he jé ěg tóg ke mū. Kỹ ěg tóg ti to: “ěg tỹ ti to mū kỹ tóg ěg mỹ nén ũ há ěn nĩm ke mū, ti tỹ ěg mỹ nén tó ja ěn ti,” henh ke mū gé. Tag tó kỹ ěg tóg ti to mũnh ke mū, kỹ tóg ěg mỹ han ke mū, ha vemnĩ.

⁷Noé vỹ Topē ki rā kỹ nī ja nĩgtĩ gé, hā kỹ Topē vỹ ti mỹ tó ja nī, ag kar tỹ kar kỹ ti jagy venh ke ti, hā vỹ: ta kutē, he mū. Kỹ tóg Topē vī kri fi kỹ canoa mág ěn han mū, kỹ tóg han kãn kar kỹ (tóg) ki rā kỹ (tóg) kren mū, ti prũ fi mré, ti krē mré ke gé. Topē ki rā kỹ tóg ũ tỹ Topē kato vāsãnsãn mū ag mré tĩg mãn ja tũ nī. Hā kỹ Topē vỹ ti mỹ ũn jykre kuryj ag tỹ nén venh ke ěn ven, ti tỹ ũ tỹ ti ki rā kỹ nỹtĩ ag mỹ nén ven ke ěn tĩ.

⁸Abraão vỹ Topē ki rā kỹ nī ja nĩgtĩ gé, hā kỹ tóg Topē vī kri nĩm ja nĩgtĩ. Topē tóg ti mỹ: “ha tĩg,” he mū, kỹ tóg tĩg ja nī, ga ũ ra, Topē tỹ ti mỹ ga nĩm ke mū ěn ra. Ā tỹ ki kagtĩg ra tóg ra tĩg ja nī. Ā jamā tá kãkutē kỹ tóg ā tỹ ki kagtĩg ěn ra vyr, Abraão ti. ⁹Topē ki rā kỹ jē kỹ tóg ga ěn mĩ tĩg ja nĩgtĩ. Topē tỹ ti mỹ ga ěn nĩm sór ja vē, hā ra tóg tỹ ā tũ tú ra tóg mĩ tĩg ja nĩgtĩ, tá. Kur tỹ in krēm ěmãn kỹ tóg ga ěn mĩ tĩg ja nĩgtĩ, ti kósin tỹ Isaque mré, Isaque kósin tỹ Jacó mré ke gé. Ti krē'krē ag vỹ ti mré ga ěn venh ke ja nỹtĩ gé, hā kỹ Topē tóg Abraão mỹ tó ja nī, hā ra ag tóg ver vég tũ nī. ¹⁰Ge ra tóg tovãnh ja tũ nĩgtĩ. Cidade tỹ Topē tũ ěn ve sór ja ti nī, ũ tỹ tĩg ke tũ pē ěn. Topē hā vỹ cidade ěn han. To jykrén kỹ tóg han. Ti pi(jé) ěprā ke ag cidade ri ke nĩ! ěn ve sór kỹ tóg ti tovãnh ja tũ pē nī, hā kỹ tóg vé, Abraão ti.

¹¹Sara fi vỹ Topē ki rā kỹ nī ja nĩgtĩ gé, hā kỹ fi tóg ā kófa pē ra (fi tóg) kufyg ja nĩgtĩ, Topē tỹ fag tỹ tag to tar han kỹ, Sara fi, fi mén tỹ Abraão mré. ũ tỹ fag mỹ: “kósin ve jé ājag tóg ke mū,” he mū ěn vī kri fi kỹ fag tóg ve ja nĩgtĩ. ¹²Hā kỹ ũn pir ěn, ũn kófa pē ěn krē'krē vỹ e tãvĩ nỹtĩ, krĩg e ěn ri ke, goj fyr mĩ rỹnhryj e ěn ri ke, goj kafā tũ fyr ěn mĩ rỹnhryj e ěn ri ke.

¹³Topē ki ge kỹ nỹtĩn kỹ ag kãgter, Abraão, Isaque, Jacó. Topē vỹ ag mỹ ga ěn tó ja nī, hā ra ag tóg ve ja tũ nī ver. Ājag tỹ ve pē han tũ ra ag kãgter. Ve sī han ja ag tóg nỹtĩgtĩ, Topē tỹ ag mỹ ga tó ja ti, hā ra ag tóg ve pē han ja tũ nī kỹ tóg ag mỹ ěg tỹ kór há tá nén ũ vég mū ri ke nī ja nĩgtĩ. Ag tỹ venh ke to tóg ag mỹ sér gy tĩ hā ra. “Tag ki, ga kri ěg tóg ũn pygsa mū ěn ri ke han tĩ, ěg jamā vỹ tỹ tag ki ke tũ nī,” he ag tóg tĩ. ¹⁴Ag jamā pē jãvãnh kỹ ag tóg ga kri mū ja nĩgtĩ, hā kỹ ag tóg: “ěg jamā pē tũ vē, tag ki,” he ja nĩgtĩ. ¹⁵Ag pi(jé) ājag jamā si ěn ra vỹn vỹn ke sór ja nĩgtĩ, hā kỹ ag tóg vỹn vỹn ke ja tũ nī. ¹⁶Ěmā há pē ěn ve sór ja ag tóg nĩgtĩ, kanhkā tá. Hā kỹ ag tóg Topē mỹ há ja nỹtĩ, ti pi(jé) ag to mỹ'ãg ke mū! Hā kỹ tóg vēso: “Abraão Topē, Isaque Topē, Jacó Topē vỹ tỹ inh nī,” he tĩ, Topē ti. Cidade han tóg, ag mỹ, kanhkā tá.

¹⁷Abraão vỹ Topē ki rā kỹ nī ja nĩgtĩ gé, hā kỹ tóg Isaque nenh ja tũ nĩgtĩ. Topē mỹ tóg ti fěg, Topē tỹ ti mỹ ti kósin to vĩn kỹ. Ti kósin pir ja vē, hā ra tóg ti tãnh kren, Topē mỹ. ¹⁸Topē tóg Abraão mỹ: “ã kósin tỹ Isaque krē vỹ e nỹtĩnh mū,” he ja nĩgtĩ. ¹⁹Kỹ tóg, ti tỹ ti tãnh kren kỹ tóg: “Topē hỹn ti rĩn mãn ki kanhró nī, isỹ

ti tén kÿ,” he mû. Hã kÿ tóg ti ve mǎn gé. Ti tÿ ti tǎnh kren kÿ tóg Topě mÿ ti tÿ ti tǎnh ri ke nĩ ja nĩgtĩ, hã ra tóg ti ve mǎn, Topě tÿ ti mÿ: “ti tǎnh tũg ra,” hen kÿ.

²⁰Isaque vÿ Topě ki rã kÿ nĩ ja nĩgtĩ gé, hã kÿ tóg Jacó mÿ vĩ há han, Esaú mÿ ke gé, ti tÿ ag mÿ ag tÿ nén venh ke ên tó kÿ.

²¹Jacó vÿ Topě ki rã kÿ nĩ ja nĩgtĩ gé, hã kÿ tóg ã ter ke to hã (tóg) José krě régre ên ag mÿ vĩ há han gé. Kÿ tóg ã vátó to jě kÿ (tóg) Topě krêm mũg ke mû, kÿ tóg Topě mÿ: “Topě vÿ tÿ ã nĩ,” he ja nĩ.

²²José vÿ Topě ki rã kÿ nĩ ja nĩgtĩ gé, hã kÿ tóg ã ter ke nÿ ra tóg ã ter ken jo (tóg) Israel ag mÿ kámén ja nĩgtĩ, ag krě'krě ag tÿ ga tÿ Egito tá kãpanh ke ên ti. Kÿ tóg ag tÿ kãpanh ke ên tó kÿ (tóg) ag mÿ to vĩ ja nĩ, ag tÿ ti kuka gé kãmũnh jé, ag kãmũnh ken kÿ.

²³Moisés han mû fag vÿ Topě ki ge kÿ nÿtĩ gé, hã kÿ fag tóg Moisés péju, ti mur kar kÿ, kysã tãgtũ ki. Fag mÿ tóg sinvĩ nĩ ja nĩgtĩ, gĩr sí ti. Kÿ fag tóg pã'i mág kaměg sór ja tũ nĩ, pã'i mág tÿ: “gĩr gré ag kãgtén kãn nĩ,” he mû ra.

²⁴Moisés vÿ Topě ki rã kÿ nĩ ja nĩgtĩ gé, hã kÿ tóg, ã mog kar kÿ (tóg): “inh pi(jé) tÿ Faraó kósín fi kósín nĩ!” he ja nĩgtĩ. ²⁵Ti tÿ Topě povo ag mré jagtar nĩ ra tóg ti mÿ tÿ nén ù tũ nĩ ja nĩgtĩ. Hã ra tóg Egito tá ke ag mré rico nĩ sór ja tũ nĩgtĩ. Topě vĩ mranh kÿ ag tóg ón kÿ rico nÿtĩ ja nĩgtĩ, Egito tá ke ag. ²⁶Ēg tÿ Cristo tigrĩn jagtar nÿtĩ tag tóg ti mÿ ěg rico nÿtĩ tag há kãfór nĩ ja nĩgtĩ, hã kÿ Egito tá ke ag rico tag tóg ti mÿ kórég ja nĩgtĩ, Moises mÿ. Topě tÿ kanhkã tá ěg mÿ nén ù há nĩm ke ên hã to tóg jykrén ja nĩgtĩ.

²⁷Moisés vÿ Topě ki rã kÿ nĩ ja nĩgtĩ, hã kÿ tóg ga tÿ Egito tá kãkutě ja nĩgtĩ, pã'i jũ kaměg vǎnh nĩn kÿ. Topě vég tũ ěg tóg nĩgtĩ, hã ra tóg Topě hã ki ěkrén kÿ nĩ ja nĩgtĩ. Ti vĩ tóg ti mÿ ti tÿ ti vég nĩ ri ke nĩ ja nĩgtĩ. Hã kÿ tóg krónh ke ja tũ nĩgtĩ, Moisés ti.

²⁸Moisés vÿ Topě ki rã kÿ nĩ ja nĩgtĩ, hã kÿ tóg Israel ag mÿ festa tÿ Páscoa ên nĩm. Ag mÿ tóg: “ĩn jãnkã to tĩn, ovelha kyvénh tÿ,” he mû, “Topě tÿ jěně jafã tÿ ajag krě ve ag kãgtén tũ nĩ jé,” he ja tóg nĩgtĩ, Moisés ti, Israel ag mÿ. Hã kÿ ag tóg festa tÿ Páscoa ên han ti, ũri.

²⁹Israel ag vÿ Topě ki ge kÿ nÿtĩ ja nĩgtĩ gé, hã kÿ ag tóg goj kusũg he mû ên kã rěgrěg há han inhhã, ěg tÿ ga kri mû ên ri ke han ag tóg. Mrinmrér ja tũ ag tóg nĩgtĩ. Egito tá ke ag tÿ ag nón kã rěgrěg sór mû ra tóg ag kri rũm ke mû sir, goj ên ti, kÿ ag tóg nÿgnÿr kÿ kãgter kãn mû sir.

³⁰Israel ag vÿ Topě ki ge kÿ nÿtĩ ja nĩgtĩ gé, hã kÿ cidade tÿ Jericó jy ró ên vÿ vėsóg ki kórég kãn ja nĩgtĩ. Ag tÿ pénĩn mû tÿ 7 (ke) han kar kÿ tóg vėsóg ki kórég ja nĩ, ag tÿ kurã tÿ 7 (ke) ki pénĩn mû kar kÿ.

³¹Raabe fi vÿ Topě ki rã kÿ nĩ ja nĩgtĩ gé. Ũn mén (ka)mě vÿ tÿ fi nĩ ja nĩgtĩ, hã ra fi tóg Topě ki rã. Hã kÿ fi tóg Israel ag mÿ: “ha kãge jěg,” he ja nĩ, ù tÿ fi jamã venh kãmũ mû ag. Hã kÿ ag tóg fi tén ja tũ nĩ gé. Cidade tá ke kar kãgtén ja ag tóg nĩgtĩ, ag tÿ Topě vĩ mē sór ja tũ tigrĩn, hã ra fi tóg inhhã kren ja nĩgtĩ.

³²Inh hÿn ù tónh ke mû gé ver!. Isÿ ag tó kãn sór mû ra tóg inh mÿ vėnhmÿ tĩ. E ag nÿtĩ, e tãvĩ, Gideão ti, Baraque ti, Sansão ti, Jefte ti, Davi ti, Samuel

ti, Topê ví tó tí kar ag. ³³Topê ki ge kãn kÿ ag nÿtí, hã kÿ ag tóg pã'i ag mré vênh génh han, hã ra ag tóg pã'i ên ag tÿ hên ri ke kãn. Vênh jykre kuryj han ag tóg tí, vênh kar mÿ. Kÿ Topê tóg ag mÿ ã tÿ ag mÿ vênh jykre há tó mü ên tÿ ag mÿ ven mü sir. Míg tÿ ù mãn sór mü ra tóg ti tÿ hê ri ke ja tú nigtí gé, míg ti. ³⁴Pi gru jagy ên vÿ ag tÿ hê ri ke ja tú nigtí gé, ù tÿ Topê ki ge kÿ nÿtí ag. Û tÿ rógro tÿ ag tén sór mü ra tóg ag tÿ hê ri ke ja tú nigtí gé. Ag krój nÿtí ra ag tóg tar gy nÿtí ja nigtí. Vênh génh han kÿ ag tóg rárá há han, kÿ ag tóg ag kato vãsãnsãn mü ag tÿ pétê han gé. ³⁵Ûn tÿtá ù fag vÿ, ájag krê ter kar kÿ fag vÿ ag ve mãn, ag tÿ ag rín mãn kÿ, Topê ki ge kÿ nÿtí ên ag.

Hã ra ag kato vãsãnsãn mü ag vÿ ag to jü mág, kÿ ag tóg ag kãmí ù ag vóg kónãn gé. Kÿ ag tóg ag kygrêg gé, ù tÿ Topê ki ge kÿ nÿtí ag, ag tÿ Topê to jü kÿ, ù tÿ ag kygrêg mü ag. Ag mÿ ag tóg: “ájag tovãnh jé êg tóg ke mü, ájag tÿ Topê tovãnh kÿ,” he ja nigtí, hã ra ag tóg Topê tovãnh sór ja tú nĩ. ³⁶Ag kãmí ù ag to ag tóg é he mü gé, kÿ ag tóg ag mrãnmrãn gé, ag sigse ag tóg, ke gé, kÿ ag tóg vëse jafã kátá ag vãm gé. ³⁷Pó tÿ ag pin kÿ ag tóg ag kãgtén gé, ránran jafã tÿ ag tóg ag ránran gé, serrote tÿ. Rógro tÿ ag tóg ag kãgtén gé, Topê ki ge kÿ nÿtí ag. Ag tÿ hê mí mün kÿ ag tóg carneiro fár tÿ kur rinh ja nigtí, cabrito fár tÿ kur ke gé, ag tÿ Topê ki ge tugrín jagtar nÿtín kÿ. Vêjên ve ja tú ag tóg nigtí kejên, jagãgtar ag tóg nÿtí, ag vóg kónãn ja ag tóg nigtí gé. ³⁸Ag mré ke ag vÿ kórég pë nÿtí ja nigtí, hã kÿ ag tóg ün há tag ag to kórég nÿtí ja nigtí. Kÿ ag tóg ga kórég kri mü ja nÿtígtí, ag jo pétê kÿ, sór kri ag mügtí, kÿ ag tóg pãnónh nor kãki nÿtí ja nigtí gé, ga nor kãki ke gé, ù tÿ Topê ki ge kÿ nÿtí ag. Êprã ke ag vÿ ag to jü mág nÿtí ja nigtí.

³⁹Ag tÿ Topê ki ge kÿ nÿtín kÿ tóg hã ra ag to há nĩ, Topê ti. Hã ra ag tóg tag ki ve ja tú nĩ ver, ag tÿ nén ve sór mü ên ti, Topê tÿ ag mÿ nén tó ja ên ti. ⁴⁰Topê vÿ êg to jykren ja nĩ gé, hã kÿ tóg ver ag mÿ ven ja tú nĩ. Ti tÿ êg mré ag mÿ ven sór vë, êg tÿ jagnê mré kanhkã tá junjun jé.

Topê tÿ êg kanhrãn sór mü

12 ¹Ha vé, e tãví ag nÿtí, ù tÿ êg jo Topê tovãnh tú ag. Êg pénin ag e nÿtí, êg ve kÿ. Kÿ tóg há tí, êg tÿ Topê japry jagma mü há han ke ti, ti jamín jagma. Êg tÿ corrida han ri ke ti nĩ. Êg tÿ tÿ vaj kÿ corrida han ken kÿ êg tóg vênhkãn há han ke mü. “Sÿ tag han kÿ inh mÿ corrida to krónh kenh ke tú nĩ vÿ?” he êg tí. “Ne nÿ isar han mü, corrida to?” he êg tóg tí gé. Êg tÿ nén han ke mü ên tovãnh êg tóg tí, êg tÿ corrida to krónh ke tú nĩ jé. Topê jykre ri ke ti nĩ, tag ti. “Tag mÿ Topê to isar han mü vÿ?” hemnĩ, ájag tÿ nén han ke mü ên kar to. Ájag tÿ nén han ke mü tugrín ti to tar nÿtín kÿn há tí. Ájag tÿ nén han ke mü ên tugrín ti to krónh kenh ha mē tñn kÿ han tũg nĩ, tovãnh nĩ. Ti ví mranh sór tũg nĩ gé. Tag vÿ êg kókén pë han tí. Ájag tÿ nén han tí tag kar tovãnh kÿ ájag tóg ti jykre hã to krónh kenh ke tú pë nĩ. ²Jesus hã mí êkren nĩ, ti jykre hã tÿ krín kÿ nÿtímnĩ. Ti hã vÿ êg tÿ Topê ki rá han, kÿ tóg êg tÿ ti tovãnh ke tú han ên ki kanhró nĩ gé. Cruz to sa kÿ tóg ter

mÿr, ag tÿ ti to é he mũ ra tóg ti mÿ tÿ nén ù tũ tí. Ti tÿ kar kÿ nén venh ke ên mĩ tóg êkrén ja nĩ, nén tÿ ti mÿ sér nĩnh ke ên mĩ. Hã kÿ tóg ùri Topê pëgja tá nĩ nĩ.

³Jesus mĩ êkrén nĩ. Êprã ke kar ag vÿ ti kato vĩ ja nĩgtĩ, ù tÿ Topê vĩ mranh mũgtĩ ên ag, ge ra tóg Topê to krónh ke ja tũ nĩgtĩ, Jesus ti. Ti ki êkrén kÿ to krónh krónh ke tũg nĩ, to: “ron inh mũ,” he tũg nĩ gé.

⁴Ha vé, Topê vĩ mranh tũg nĩ. Ājag tÿ ti vĩ mranh sór mũ tag kato vāsānsān nĩ, ke tũ nĩ (mũ) ra ājag tóg to ter mũ. ⁵Ājag mÿ Topê tÿ ěg jyvĕn ěn kã jatũ? ěg jyvĕn kÿ tóg tag tó, ha mẽ. Ā krĕ mÿ tóg tag tó, Topê tí, ha mẽ: “inh kósín, isÿ ā vóg kónān kÿ inh mÿ vĕnh nenh tũg nĩ,” he tóg. “Isÿ ā mÿ vĩ tar han mũ ra to krónh ke tũg nĩ. ⁶Isÿ ā to há nĩn kÿ, hã kÿ sóg ā mÿ vĩ tar han tí. Ā kanhrān jé ke vĕ. Isÿ ā mÿ: “inh kósín vÿ tÿ ā nĩ,” hen kÿ sóg ā mrānmrān tí gé, ā kanhrān tí jé,” he tóg, Topê vĩ tÿ rán kÿ nĩ ki.

⁷Hã kÿ ti tÿ ājag mrānmrān tag to tar nÿtĩmĩ. Ājag kanhrān jé ke vĕ. Topê tÿ ājag mÿ: “inh krĕ,” he vĕ. ěg panh vÿ ěg mrānmrān kÿ ěg kanhrān ja nĩgtĩ gé. Vĕnh kar jykrén hã vĕ. Topê vÿ ā krĕ kar mrānmrān kÿ ag kanhrān tí. ⁸Kÿ, ti tÿ ājag mrānmrān tũ nĩ ra ājag pí(jé) tÿ ti krĕ pĕ nÿtĩnh mũ vĕ! ⁹Ha vé, ěg han mũ fag vÿ ěg mrānmrān tí, ěg kanhrān jāvānh nĩn kÿ, kÿ ěg tóg fag kamĕg tí. Kÿ ěg tóg Topê kamĕg kãfór han ke mũ, ù tÿ ěg rĩnrĩr han mũ ti, ěg jóg mág ti. ¹⁰Kÿ ù tÿ ěg han mũ tóg ěg to ā jykre fi ja nĩgtĩ. To jykrén kÿ tóg ěg mrānmrān tí kejĕn, ěg sín kã. Kejĕn tóg ā tÿ kygnĕ kÿ nĩ ra ěg kanhrān sór tí gé, ěg panh tí. Hã ra Topê tÿ ěg mrānmrān kÿ tóg to jykrén há han tí inhã. Ti tÿ ěg kãnhrān há han sór vĕ, ěg tÿ ti ri kén kygnĕg tũ nĩ jé, ěg tÿ ti ri kén há tãvĩ nÿtĩ jé. ¹¹Ti tÿ ěg mrānmrān ěn kã tóg ěg mÿ sér tũ nĩ ver. ěn kã tóg ěg mÿ jagy tí. Kar kÿ ěg tóg vāhã vĕg tí, ti há nĩ ja ti, ěg tÿ kanhrān há han kar kÿ. Ti tÿ ěg mrānmrān hã kÿ ěg tóg vĕnh jykre há han ěn ki kanhrān mũ sir, jagnĕ krĩ kuprãg ki ěg kanhrān mũ gé sir.

ěg tÿ jagnĕ tar han ke

¹²Krónh ke ve ājag tóg nĩ, kÿ ājag tóg tÿ ùn kaga tũg kórég ěn ri ke nÿtĩ. To tar' he mǎn nĩ, ājag tÿ mũ há han mǎn jé. ¹³Topê japry kuryj hã jagma ěvānh nĩ, kÿ ù tÿ ājag mÿ to krónh ke ha mẽ ěn ag vÿ ājag mré to tar' he mǎn mũ gé. Topê jykre tovānh sór nĩ ve ājag nÿtĩ, hã ra tóg ājag tar han mǎn sór mũ.

¹⁴Vĕnh kar mré vĕnh jykre kuryj han sórmnĩ. Kÿ Topê vĩ ki króm kÿ kygnĕ sór tũg nĩ. ěg tÿ tag to vāsān tũ nĩn kÿ ěg pí(jé) ěg jóg mág venh ke mũ! ¹⁵Vĕnh ki rĩr há han nĩ, ājag kãmĩ ù tÿ Topê tÿ ěg jagāgtān mũ tag to é he tũg jé. Ājag kãmĩ ùn pí tÿ vĕnh jykre kórég to tar nĩn kÿ tóg ěg mÿ ti tÿ ùn e ag krĩn kónān ha mẽ tí, ag tÿ ti jykre kórég ěn ri ke nÿtĩ jé. Kÿ tóg ěg jakré kãmĩ vānh jagy ri ke nĩ. ěg jakré kókég ti tí, vĕnh jykre kórég tÿ ěg kókén ri ke. ¹⁶Vĕnh ki rĩr há han nĩ gé, ājag kãmĩ ù tÿ Esaú jykre kórég ěn ri ke han tũ nĩ jé, ù tÿ Topê kato vāsān tũ nĩ jé. Esaú vÿ Topê to é he ja nĩgtĩ, kÿ tóg vĕjĕn tugrĩn ā panh tÿ ti mÿ vĩ há han ke ěn kren. Ā jāvy mÿ tóg tovānh, ti panh tÿ ti mÿ vĩ há han ke ěn ti, ā jĕn ke pí tugrĩn mÿr. Tĩ tÿ ā panh tÿ ti mÿ vĩ há han ke ěn to é he hã vĕ. ¹⁷Kar kÿ tóg mẽ sór ja nĩ, ti panh tÿ ti mÿ vĩ há han ke tí, hã ra tóg mĕg tũ nĩ sir. Kÿ tóg fÿ ja nĩgtĩ, ti panh

tý ti mý ví há han jé, vāhā tóg ti mý e nĩ ja nĩgtĩ, hā ra tóg sir rāké ja ný. Měg tũ tóg nĩ sir, ti panh tý ti mý ví há han ke ti. Tag ri ke han sór tũg nĩ.

Topě jũ tý jagy pě

¹⁸Vāsý Topě vỹ ěg jóg'jóg ve ag mý ā jykre nĩm ja nĩgtĩ. Pānónh tý Sinai tá ag tóg junjun ja nĩgtĩ. Pĩ ve ag tóg, tá, kýt tóg tá kuty nĩ ja nĩgtĩ gé, kuty pě, kóho jũ ke gé. ¹⁹Kýt trombeta ěn vỹ kyr ja nĩgtĩ gé. Kýt Topě vỹ ag mý ví ja nĩ gé. Ag tý ti ví mẽ kýt ag tóg jürũn ke ja nĩgtĩ, kýt ag tóg ti mý to ví mũ, ti tý ag mý vēmén tũ nĩ jé, ti tý ag kānhmý Moisés hā mré vēmén jé, ěgno ki. ²⁰Ag mý tóg: “ājag mẽg ũ tý pānónh tag rā hā jun kýt ti tén nĩ,” he ja nĩ, “pó tý ti pin kýt, ājag krē ke gé, ājag prũ fag ke gé, ājag tý tá nén vég mũ kar ěn ti. Ti tý pānónh tag vóg tugrĩn ti tén nĩ,” he ja tóg nĩ, Topě ti. Hā tóg ag mý e ja tĩgtĩ. ²¹Topě tý ag mré vēmén kýt tóg ag mý e tāvĩ nĩ ja nĩgtĩ, Moisés mré hā, hā kýt tóg: “jürũn ke inh, mũmėg kýt,” he mũ gé, Moisés ti.

²²Hā ra tóg ag tý nén ve ja ěn ri ke tũ nĩ, ěg tý ũri Topě rĩnja tá jun ke ti. Pānónh ěn ri ke tũ ti nĩ, ěg tý kanhkā tá nén venh ke ti. ěg tý kanhkā tá jun ken kýt ěg ter mǎn ke tũ nĩ gé, ěg tý kanhkā tá pānónh tý Siāo he mũ ěn tá jun ken kýt. Topě jamā tá ke vē, ũn rĩr mũ ěn jamā tá ke vē, hā vỹ: Jerusalém, he mũ, kanhkā tá cidade ěn ti. Topě tý jėgně jafā ag vỹ tá nýtĩ. E tāvĩ ag nýtĩ, e tāvĩ, ti tý jėgně jafā ag. Festa mág pě vē, tá. ²³Kýt Topě krē sanh kar ag vỹ tá nýtĩnh ke mũ gé, ũn tý Jesus ki ge kýt nýtĩ ag kar. Ag jygyj vỹ kanhkā tá rán kýt nýtĩ. Kýt Topě vỹ tá nĩ gé, ũ tý vėnh kar jykre tugným ke ti. Kýt ũ tý ěg jo Topě ki ge kýt nýtĩ ag kuprĩg vỹ tá nýtĩ gé, ũ tý ěg jo tá junjun mũ ěn ag. ²⁴Kýt Jesus vỹ tá nĩ gé, ũ tý ěg mý vėnh jykre tǎg nĩm mũ ěn ti, ũ tý ěg jagfy ter mũ ěn ti, kýt ěg tóg ti kyvėnh tugrĩn jǎnhkri nýtĩ, Topě tý ěg mý vėnh pǎte fón ti kýt. Topě tý Abel kyvėnh ven kýt tóg jũ mũ, ũ tý ti tén ja ěn to. Topě tý Jesus kyvėnh ven kýt tóg jǎvo ěg mý vėnh pǎte fón mũ. ěg tũn hā vē, Jesus tý ěg mý vėnh jykre nĩm jan hā vē, hā kýt tóg Moisés jykre kǎfór nĩ, Jesus ti.

²⁵Hā kýt jėmě há han nĩ. ũ tý ājag mý Topě ví tó mũ ěn ví jėmě há han sórnmĩ. ěg jóg'jóg ve ũ ag vỹ Topě ví mẽ sór ja tũ nĩgtĩ, ti tý ag jyvėn mũ ra. Hā kýt ag krenkren ja tũ nĩ. Kýt ěg krenkren ke tũ nĩ gé, ěg tý ũ tý kanhkā tá nĩ ěn to ěg mré vēmén sór mũ ěn ví jėmě sór tũ nĩn kýt, ti tý ěg jyvėn mũ ti. ²⁶Vāsý tóg, ā tý ěg jóg'jóg ve ag mré vēmén kýt tóg ga tý ragra ke han ja nĩgtĩ. ũri tóg ěg mý tag tó, ha mẽ. “Ga tý ragra ke pir han mǎn jé sóg ke mũ,” he tóg. “Ěn kǎ kanhkā vỹ ragra ke mũ gé, ha vemnĩ,” he tóg. ²⁷Ti tý: “ke pir han mǎn jé sóg ke mũ,” hen kýt ěg tóg ki kanhró nýtĩ, ti tý ā tý nén han ja tag tý tũ' he sór mũ ti, ti tý ga tý ragra kenh ken ki. Nén ũ tý ragra kenh ke tũ ěn hā tóg nĩnh ke mũ inhhā, hā vỹ: “Topě jamā, he mũ. ²⁸Kýt tóg há tĩ, ěg tý Topě mý: “há ti nĩ, ā tý ěg mý nén han mũ ti,” hen kýt. ěg jamā tǎg vỹ inhhā ragra kenh ke tũ pě nĩ, ti tý ěg mý ěg jamā nĩm ke ěn ti. Kýt tóg há nĩnh mũ gé, ěg tý Topě rǎnhřǎj han há han kýt, ti tý ti mý sér nĩ jé. Ti kamėg jé ěg tóg ke mũ gé, ěg tý tóg jürũn kenh mũ. ²⁹Topě vỹ pĩ tý nén ũ kar kugprũg mũ ri ke nĩ.

Topê tÿ êg jyvên

13 ¹Jesus ki ge kÿ nÿtî ag tÿ jagnê to há nÿtî to krónh ke tÿg nî. ²Û tÿ kuvar há tá ãjag to pasa ken kÿ ti mÿ: “inh mré jê,” hemní. Êg jo ke ù ag tóg, ag tÿ ù ag to: “inh mré nÿtî,” hen kÿ (ag tóg) Topê tÿ jênê jafá ag mÿ: “inh mré nÿtî,” he ja nÿgtî, ag tÿ ag ki kagtig (há) ra. Há kÿ tag han nî. ³Ûn sigse kÿ nÿtî ag ki rîrnmî. Ájag tÿ kejên Jesus tugrîn sigse kÿ nÿtînh ke tag mî êkrén nî, há kÿ jagnê ki rîr há han nî. Ag tÿ ùn vóg kónân mû ag ki rîrnmî gé. Kejên ag tóg ãjag vóg kónân ke mû gé, Jesus tugrîn, há kÿ ag ki rîr há han nî.

⁴Û prû fi to én tÿg nî, ù mén to én tÿg nî gé. Ájag prû nÿtînh kÿ ù fi mré nÿ sór tÿg nî, ãjag mén nÿtînh kÿ ù mré nÿ sór tÿg nî gé. Topê vÿ ù tÿ vênh jykre kórég han (ka)mê ên ag to jÿnh ke mû, ù tÿ fag mré nÿ sór (ka)mê ên ag to, fag tÿ ag mré nÿ sór (ka)mê ên fag to ke gé.

⁵Rico nÿtî sór tÿg nî gé. Ájag tÿ nén vég mû ên vÿ há nî. Topê vÿ êg mÿ tag tó, ha mē: “ãjag kã jatu! henh ke tû pê sóg nî, ãjag ki sóg rîr nî nî,” he tóg, Topê ti. ⁶Hã kÿ tag tómnî, ha mē: “êg jóg mág vÿ inh ki rîr ke mû,” hemní. “Ti há kamêg isóg mû. Êprã ke ù vÿ inh vóg ke tû pê nî, ti tÿ inh ki rîr nînh kÿ,” hemní, Topê vî kri fi kÿ.

⁷Û tÿ ãjag mÿ Topê vî tó vén mû ên mî êkrén nî. Ga kri mûnh kÿ ag tóg Topê tovãnh ja tû pê nÿgtî, ãjag tÿ ti tovãnh tû ra ag tóg kãgter ja nî. Ag ri ke han sórmnî, ti ki rá ên tovãnh sór tÿg nî gé, ag ri ke han nî. ⁸Jesus Cristo há vÿ ter tû nî. Ti tÿ vãsÿ nén to jykren mû ên há han ti tí, ùri, kÿ tóg há han mán ke mû gé. Tÿ ù han ke tû ti nî, kÿ tóg kurã krÿg ja tû nî gé. ⁹Û tÿ ón kÿ ãjag mÿ nén ù ù tó sór mû ên vî jêmê tÿg nî, ag tÿ ón kÿ Topê to nén ù ù tó mû ra. Ájag krîn kónân jé ag tóg ke mû. Ájag tÿ tÿ prãnh ke han sór jé ag tóg ke mû. Topê vÿ ãjag tar han ki kanhró nî, ãjag jagãgtãnh kÿ. Û tóg: “ã tÿ vÿjên tag kon kÿ ã tóg Topê jykre to tar nî,” he tí. Ag ón vê. Vÿjên vÿ êg tÿ ti jykre to tar nî han ke tû pê nî. Topê há ne êg tar han ki kanhró nî!

¹⁰Ha mē, Moisés jykre ki Topê mÿ nén ù pûn tí ag pi(jé) êg mré Jesus jamînh ên konh ke mû! ¹¹Ag tÿ Topê tû ki rîr tí to pâli mág ên vÿ ag mēg ù tãnh kÿ ti kyvénh ma tí tí, ag tÿ to: “Topê nÿgjafã,” he mû ên ra. Ti tÿ ag mēg kyvénh ên tÿ êg tÿ Topê vî mranh mû tÿ tÿg! he sór vê vê. Há ra ag tóg ãjag jamã jy ró pãñi to ag tóg ãjag mēg tãnh kÿ pûn tí. ¹²Hã kÿ Jesus tóg cidade jy ró ên pãñi to ter ja nî gé, ti tÿ êg jagfÿ ter kÿ, êg jãnhkri han jé. ¹³Kÿ êg tóg ti jagtar ri ke han ke mû gé. Û tÿ ti ki ge jãvãnh ag jykre han tû êg tóg nî, kÿ êg tóg ag mré han ke tû nî gé. Jesus tÿ cidade jy ró pãñi to ter ja ên mî êg tóg êkrén kÿ nÿtî, kÿ êg tóg ù tÿ ti ki ge tû ag mré ag jykre han ke tû pê nî. ¹⁴Tag ki, ga kri êg tóg êg jamã pê venh ke tû nî. Kanhkã tá êg tóg ve sór mû, êg jamã ti.

¹⁵Êg tÿ Jesus tugrîn Topê mÿ vî há han kÿ tóg há tí. Êg tÿ nén vég mû kar to êg tóg ti mÿ: “êg mÿ tóg há tí, êg mÿ tóg sér tí,” henh ke mû. Êg tÿ ti mÿ nén ù pûn mû ri ke tóg nî, presente ri ke tóg nî, êg vî tag. “Êg jóg vê,” he jé êg tóg ke mû gé, ti to. Ti mÿ vî há han ke to krónh ke tÿg nî. ¹⁶Jagnê ki rîrnmî gé, jagnê

mré nén kar han kÿ. Tag to krónh ke tũg nĩ gé. Ęg tÿ Topẽ mÿ nén ù pũn ri ke ti nĩ, Ęg tÿ ti mÿ presente han ri ke ti nĩ, Ęg tÿ jagnẽ ki rĩr tĩ ti, kÿ tóg ti mÿ sér tĩ.

¹⁷Ú tÿ ãjag kanhrãn tĩ ěn ag vĩ jẽmẽmnĩ, ag tÿ ãjag mÿ nén tó mũ ěn ki króm nĩ. Ajag ki rĩr ag tóg nĩgtĩ, ãjag tÿ Topẽ tovãnh tũ nĩ jé, kÿ Topẽ vÿ ag rãnhraj tugnÿm ke mũ. Ājag tÿ ag vĩ jẽmẽn kÿ tóg ag mÿ kufy tũ nĩnh mũ, ag rãnhraj ti, kÿ tóg ag mÿ sér tinh mũ. Ti tÿ ag mÿ kufy nin kÿ tóg há tũ nĩ gé, ãjag mÿ.

Ęg tÿ Topẽ mré vēmén ke

¹⁸Inh jagfy Topẽ mré vēmén nĩ. Nén ù kórég han ja tũ inh nĩ, ki kanhró sóg nĩ. Isÿ nén ù kuryj han sór vẽ mÿr, tag hà to sóg jykrén tĩ. ¹⁹Kÿ inh jagfy Topẽ mré vēmén nĩ, Topẽ tÿ kãnhmar ãjag to inh jẽnẽ mãn jé. Ti mÿ tag to vĩn kÿ krónh ke tũg nĩ.

²⁰Topẽ mré sóg vēmén tĩ ãjag to. Ęg krĩ kuprãg ti tĩ. Kÿ tóg Jesus ti, Ęg Senhor ti rĩn mãn ja (ti) nĩ gé, ti tÿ Ęg jagfy ter kar kÿ. Ęg jagfy ter kÿ tóg ù tÿ mé ki rĩr tĩ ěn ri ke nĩ, hà ra tóg ěn kãfór nĩ gé, ti tÿ Ęg ki rĩr há han nin kÿ. Ęg jagfy ter kÿ tóg Ęg mÿ vẽnũ jykre tãg ěn nĩm ja nĩ, ù tÿ tũ' he vãnũ ěn. ²¹Topẽ hà mÿ sóg to vĩ mũ, ti tÿ ãjag tar han jé, ãjag tÿ nén (ũ) tÿ ti mÿ há nĩ ěn hà han jé. Ti há vÿ Jesus Cristo mÿ: “ag tar han nĩ,” he ja nĩ. Ti hà mÿ Ęg tóg vĩ há han ke mũ, Jesus Cristo mÿ, kÿ tóg tũ' henh ke tũ nĩ, Ęg tÿ ti mÿ vĩ há han ke ti. Amém.

²²Inh kanhkã, sÿ ãjag mÿ tag tó sór ja vẽ. Jatun mÿ mẽ sórmnĩ, sÿ ãjag jyvẽn mũ tag. Inh pi(jé) vẽnũ ránrán mág han. Vẽnũ ránrán sĩ han sóg ãjag mÿ.

²³Ha mẽ, Ęg régre tÿ Timóteo vÿ se kÿ jẽ mãn tũ nĩ ha. Ti kava ag huri. Ti tÿ kãnhmar ki jun kÿ tóg inh mré ãjag venh kãtĩg ke mũ.

²⁴Ājag pã'i kar ag mĩ sóg ãkrég tĩ, Topẽ ki ge kÿ nÿtĩ kar ag mĩ ke gé. Tag ki ke ag, ga tÿ Itália ki Topẽ ki ge kÿ nÿtĩ ag vÿ ãjag mĩ ãkrég tĩ gé.

²⁵Topẽ jé ãjag tar han kãn.

Hã vẽ.